

欽定魏書

卷一百一十五
四十五之一

魏書卷一百五之一

齊

魏

收

撰

志第一

天象一之一

夫在天成象聖人是觀日月五星象之著者變常舛度
徵咎隨焉然則明晦暈蝕疾餘犯守飛流欬起彗孛不
恒或皇靈降臨示譴以戒下或王化有虧感達於天路
易稱天垂象見吉凶觀乎天文以察時變書曰曆象日
月星辰敬授民時是故有國有家者之所祇畏也百王
興廢之驗萬國禍福之來兆勤雖微罔不必至著於前

委言卷一百五十一 天象志
載不可得而備舉也班史以日暈五星之屬列天文志
薄蝕彗孛之比入五行說七曜一也而分爲二志故陸
機云學者所疑也今以在天諸異咸入天象其應徵符
合隨而條載無所顯驗則闕之云

太祖天興五年八月天鳴

六年九月天鳴

皇始二年十月壬辰日暈有佩璫占曰兵起天興元年
九月烏丸張超收合亡命聚黨三千餘家據勃海之南
皮自號征東大將軍烏丸王鈔掠諸郡詔將軍庾岳討
之

天興三年六月庚辰朔日有蝕之占曰外國侵土地分
五年五月姚興遣其弟義陽公平率衆四萬來侵平陽
乾壁爲平所陷

六年四月癸巳朔日有蝕之占曰兵稍出十月太祖詔
將軍伊謂率騎二萬北襲高車大破之

天賜五年七月戊戌朔日有蝕之占曰后死六年七月
夫人劉氏薨後諡爲宣穆皇后

太宗神瑞二年八月庚辰晦日有蝕之

世祖始光四年六月癸卯朔日有蝕之占曰諸佐非其
人神麤元年二月司空奚斤監軍侍御史安頡討赫連

昌擒之於安定其餘衆立昌弟定爲主走還平涼斤追
之爲定所擒將軍丘堆棄甲與守將高涼王禮東走蒲
坂世祖怒斬堆

神麿元年十一月乙未朔日有蝕之

太延元年正月己未朔日有蝕之

四年十一月丁卯朔日有蝕之

太平眞君元年四月戊午朔日有蝕之

三年八月甲戌晦日有蝕之

六年六月戊子朔日有蝕之占曰有九族夷滅七年正
月戊辰世祖車駕次東雍州庚午圍薛永宗營壘永宗

出戰大敗六軍乘之永宗衆潰斬永宗男女無少長皆赴汾水而死

七年六月癸未朔日有蝕之占曰不臣欲殺八年三月河西王沮渠牧犍謀反伏誅

十年夏四月丙申朔日有蝕之

六月庚寅朔日有蝕之占曰將相誅十一年六月己亥誅司徒崔浩

十一年十二月辛未日南北有珥

高宗興安元年十一月己卯日出赤如血

二年三月日暈

與光元年七月丙申朔日有蝕之

和平元年九月庚申朔日有蝕之

三年二月壬子朔日有蝕之占曰有白衣之會六年五月癸卯高宗崩

顯祖皇興元年十月己卯朔日有蝕之

二年四月丙子朔日有蝕之占曰將誅四年十月誅濟南王慕容白曜

十月癸酉朔日有蝕之占曰尊后有憂三年夫人李氏薨後諡思皇后

三年十月丁酉朔日有蝕之

高祖延興元年十二月癸卯日有蝕之占曰有兵二年
正月乙卯統萬鎮胡民相率北叛遣寧南將軍交趾公
韓拔等滅之

三年十二月癸卯朔日有蝕之

四年正月癸酉朔日有蝕之占曰有崩主天下改服有
大臣死五年十二月己丑征北大將軍城陽王壽薨六
年六月辛未顯祖崩

七月丙寅日有背珥

五年正月丁酉白虹貫日直珥一

承明元年三月辛卯日暈五重有二珥

太和元年冬十月辛亥朔日有蝕之

二年正月辛亥日暈東西有珥

二月乙酉晦日有蝕之占曰有欲反者近三月遠三年
四年正月癸卯洮陽羌叛枹罕鎮將討平之

九月乙巳朔日有蝕之占曰東邦發兵四年十月丁未
蘭陵民桓富殺其縣令與昌慮桓和北連太山羣盜張
和顏等聚黨保五固推司馬朗之爲主詔淮陽王尉元
等討之

三年春正月癸丑日暈東西有珥有佩戟一重北有偃
戟四重後有白氣貫日珥狀如車輪京師不見雍州以

聞

三月癸卯朔日有蝕之占曰大臣誅四月雍州刺史宜都王目辰有罪賜死

四年正月辛酉日東西有珥北有佩日暈貫兩珥

五年正月庚辰日暈東西有珥南北並白氣長一丈廣二尺許北有連環暈又貫珥內復有直氣長三丈許內黃中青外白暈乍成散乃滅

七月庚申朔日有蝕之

七年十二月乙巳朔日有蝕之

八年正月戊寅有白氣貫日占曰近臣亂十年三月丁

亥中散梁衆保等謀反伏誅

十一年十一月丁亥日失色

十二年三月戊戌白虹貫日

十三年二月乙亥朔日十五分蝕八占曰有白衣之會

十一月己未安豐王猛薨

十四年二月己巳朔未時雲氣斑駁日十五分蝕一占

曰有白衣之會九月癸丑文明太皇太后馮氏崩

十五年正月癸亥晦日有蝕之占曰王者將兵天下擾

動十七年六月丙戌高祖南伐

十七年六月庚辰朔日有蝕之

十八年五月甲戌朔日有蝕之

二十年九月庚寅晦日有蝕之

二十三年六月己卯日中有黑氣占日內有逆謀八月
癸亥南徐州刺史沈陵南叛

十二月甲申日中有黑氣大如桃

世宗景明元年正月辛丑朔日有蝕之

七月己亥朔日有蝕之

二年四月癸酉日自午及未再暈內黃外白

七月癸巳朔日有蝕之

八月戊辰日赤無光中有黑子一

三年正月乙巳日中有黑氣如鵝子申酉復見又有二
黑氣橫貫日

二月辛卯日中有黑氣大如鵝子

七月丁巳朔日有蝕之

正始元年十二月丙戌黑氣貫日

壬子日有冠珥內黃外青占曰天下喜三年正月丁卯
皇子生大赦天下

三年二月甲辰日左右有珥內赤外黃

辛亥日暈外白內黃

十月乙巳日赤無光

十二月乙卯日暈內黃外青東西有珥北有背巳時白虹貫日

永平元年三月己酉日南北有珥外青內黃暈不匝西北有直氣長尺餘北有白虹貫日

八月壬子朔日有蝕之

二年八月丙午朔日有蝕之

丁卯旦日旁有黑氣形如月從東南來衝日如此者一辰乃滅

三年二月甲子日中有黑氣二

十二月乙未日交暈中赤外黃東西有珥南北白暈貫

日皆匝

四年十一月癸卯日中有黑氣二大如桃占曰天子崩
延昌四年正月丁巳世宗昇遐

十二月壬戌朔日有蝕之在牛四度占曰其國叛兵發
延昌二年正月庚辰蕭衍郁洲民徐玄明等斬送衍鎮
北將軍青冀二州刺史張稷首以州內附

延昌元年二月甲戌至于辛巳日初出及將沒赤白無
光明

五月己未晦日十五分蝕九占曰大旱民流千里二年
春京師民飢死者數萬口

二年閏月辛亥日中有黑氣占日內有逆謀三年十一月丁巳幽州沙門劉僧紹聚衆反自號淨居國明法王州郡捕斬之

五月甲寅朔日有蝕之京師不見恒州以聞

三年三月庚申日交暈其色內赤黃外青白南北有佩可長二丈許內赤黃外青白西有白暈貫日又日東有一抱長二丈許內赤黃外青

肅宗熙平元年三月戊辰朔日有蝕之

丁丑日出無光至于酉時占曰兵起神龜元年正月秦州羌反二月己酉東益州氏反七月河州民却鐵忽聚

衆反自稱水池王

四月甲辰卯時日暈而西有一背內赤外黃南北有珥
內赤外黃漸滅

十二月己酉日暈北有一抱內赤外白兩傍有珥北有
白虹貫日

神龜元年三月丁丑白虹貫日占曰天下有來臣之衆
不三年十一月乙酉蠕蠕莫緣梁賀侯豆率男女七百萬
口來降

二年正月辛巳朔日有蝕之

正光元年正月乙亥朔日有蝕之占曰有大臣亡七月

丙子殺太傅領太尉清河王懌

二年五月丁酉日有蝕之夏州以聞

三年正月甲寅日交暈內赤外青有白虹貫暈外有直氣長二丈許內赤外青

五月壬辰朔日有蝕之占曰秦邦不臣五年六月秦州城人莫折大提據城反自稱秦王

十月己巳太史奏自八月己來黃埃掩日日出三丈色赤如赭無光曜

十一月己丑朔日有蝕之占曰有小兵在西北四年二月己卯蠕蠕主阿那瓌率衆犯塞

四年十一月癸未朔日有蝕之

五年閏月乙酉日暈內赤外青南有珥上有一抱兩背
內赤外青

三月丁卯日暈三重外青內赤占曰有謀其主孝昌元
年正月庚申徐州刺史元法僧據城反自稱宋王

十二月丙申日暈南北有珥上有兩抱一背

孝昌元年十二月丙戌白虹刺日不過虹中有一背占
曰有臣背其主一曰有反城二年九月己卯東豫州刺
史元慶和據城南叛

三年十一月戊寅辰時日暈東面不合其色內赤外黃

東西有珥內赤外黃西北去暈一尺餘有一背長二丈餘廣三尺許內赤外黃

莊帝永安二年三月甲戌未時日暈三重內黃赤外青白暈東西兩處不合其狀如抱

五月辛酉日暈東西兩處不合

辛未申時日南有珥去一尺餘有一背長三丈許廣五尺餘內赤外青

七月丙寅直東去日三尺許有一背長二丈餘內赤外青半食頃從北頭漸滅至半須臾還如初見內赤外青其色分炳

十月己酉朔日從地下蝕出十五分蝕七虧從西南角起占曰西夷欲殺後有大兵必西行三年四月丁卯雍州刺史爾朱天光討擒萬俟醜奴蕭寶夤於安定送京師斬之

三年五月戊戌辰時日暈市內赤外白暈內有兩珥西有白虹貫日東北有一背內赤外青南有一背內赤外青東有一抱內青外赤京師不見青州表聞

六月辛丑日暈白虹貫日

前廢帝普泰元年三月丁亥日月並赤赭色天地溷濁六月己亥朔日蝕從西南角起雲陰不見定相二州表

聞占曰主弱小人持政時爾朱世隆兄弟專擅威福

後廢帝中興二年二月辛丑辰時日暈東西不合其色
內赤外青南北有珥西北去暈一尺餘有一背長二丈
許可廣三尺內赤外青

十一月日暈再重上有背長三丈餘內青外赤

出帝太昌元年五月日暈再重上有兩背一尺許

癸丑午時日南有珥去日一尺餘有一背長三丈許廣
五尺內赤外青

十月辛酉朔日從地下蝕出虧從西南角起占曰有兵
大行永熙二年正月甲午齊獻武王自晉陽出討爾朱

兆于酉大破之於赤洪嶺兆遁走自殺

永熙二年四月己未朔日有蝕之在丙虧從正南起占曰君陰謀三年五月辛卯出帝爲斛斯椿等諸佞關構猜於齊獻武王託討蕭衍盛暑徵發河南諸州之兵天下怪惡之語在斛斯椿傳

三年四月癸丑日有蝕之占曰有亂殺天子者七月丁未出帝爲斛斯椿等迫脅遂出於長安

孝靜元象元年春正月辛丑朔日有蝕之占曰大臣死八月辛卯司徒公高敖曹戰歿於河陰

六月己丑日暈一重有兩珥上有背長二丈餘

十一月己巳辰時日暈南面不合東西有珥背有白虹至珥不徹

二年二月己丑巳時日暈而白虹貫日不徹

興和二年閏月丁丑朔日有蝕之占曰有小兵七月癸巳元寶炬廣豫二州行臺趙繼宗南青州刺史崔康寇陽翟鎮將擊走之

武定三年冬十一月壬申日暈兩重東南角不合西南東北有珥西北有兩重背東北西北有白氣并有兩珥中間有一白氣東西橫至珥

十二月乙酉竟天微有白雲日暈東南角不合西南東

魏書卷一百五之一 天象志 十三
北有珥西北有一背去日一尺

五年正月己亥朔日有蝕之從西南角起占曰不有崩喪必有臣亡天下改服丙午齊獻武王薨

二月辛丑日暈帀西北交暈貫日并有一珥一抱

六年七月庚寅朔日有蝕之虧從西北角起

魏書卷一百五之一

魏書卷一百五之一考證

天象志敘萬國禍福之來○來監本誤未今改正
兆勤雖微○勤係動字之訛

世祖始光四年諸佐非其人○佐南監本作侯
莊帝永安二年外青白○白監本誤日今改正

魏書卷一百五之一 考證

魏書卷一百五之二

齊

魏

收

撰

志第二

天象一之二

太祖皇始二年六月庚戌月掩太白在端門外占曰國受兵九月慕容賀麟率三萬餘人出寇新市十月太祖破之於義臺塢斬首九千餘級

天興元年十一月丁丑月犯東上相

二年五月辛酉月掩東上相

八月壬辰月犯牽牛占曰國有憂三年二月丁亥皇子

聰薨

三年三月乙丑月犯鎮星在牽牛

七月己未月犯鎮星在牽牛

辛酉月犯哭星

四年三月甲子月生齒占曰有賊臣五年十一月秀容胡帥前平原太守劉曜聚衆爲盜遣騎誅之

七月丁卯月犯天關

十月甲子月犯東次相

五年四月辛丑月掩辰星在東井

五月丙申月犯太微

七月己亥月犯歲星在左角

十月戊申月暈左角時帝討姚興弟平於乾壁克之太史令晁崇奏角蟲將死上慮牛疫乃命諸軍併重焚車丙戌車駕北引牛大疫死者十八九官車所馭巨牯數百同日斃於路側首尾相屬麋鹿亦多死

乙卯月犯太微占曰貴人憂六年七月鎮西大將軍司隸校尉毗陵王順有罪以王還第

十二月庚申月與太白同入羽林

六年正月月掩氐西南星

六月甲辰月掩北斗魁第四星

十月乙巳月犯軒轅第四星

十一月辛巳月犯熒惑

天賜元年二月甲辰月掩歲星在角占曰天下兵起三年四月蠕蠕寇邊夜召兵將旦賊走乃罷

四月甲午月掩軒轅第四星占曰女主惡之六年七月夫人劉氏薨後諡宣穆皇后

五月壬申月掩斗魁第二星

二年三月壬辰月掩左執法

丁酉月掩心前星

四月己卯月犯鎮星在東壁占曰貴人死四年五月常

山王遵有罪賜死

七月己未月掩鎮星

八月丁巳月犯斗第一星占曰大臣憂三年七月太尉
穆崇薨

十月丁巳月掩鎮星在營室

三年二月己丑月犯心後星

四月癸丑月犯太微西上將

己未月犯房南第二星占曰將相有憂四年五月誅定
陵公和跋

五月癸未月犯左角占曰左將軍死六年三月左將軍

曲陽侯元素延死

十二月丙午月掩太白在危

四年二月庚申月掩心後星

五年五月丁未月掩斗第二星占曰大人憂六年十月
戊辰太祖崩

太宗永興元年二月甲子月犯昴占曰胡不安天子破
匈奴二年五月太宗討蠕蠕社論社論遁走

九月壬寅月犯昴

閏月丁酉月犯昴

二年三月丁卯月掩房南第二星又掩斗第五星

五月甲子月掩斗第五星

己亥月掩昴

六月己丑月犯房南第二星

七月乙亥月犯輿鬼

八月甲申月犯心前星

三年六月庚子月犯歲星在畢占曰有邊兵五年四月
上黨民勞聰士臻羣聚爲盜殺太守令長相率外奔
八月乙未月犯歲星在參

四年春正月壬戌月行畢蝕歲星

癸亥月掩房北第二星

閏月庚申月行昴犯熒惑

七月月蝕熒惑

八月戊申月犯泣星

十月辛亥月掩天關占曰有兵五年六月濩澤民劉逸自號征東將軍三巴王署置官屬攻逼建興郡元城侯元屈等討平之

五年三月戊辰月行參犯太白

四月癸卯月暈翼軫角

七月庚午月掩鈞鈴占曰喉舌臣憂五年三月散騎常侍王洛兒卒

八月庚申月犯太白占曰憂兵神瑞元年二月赫連屈
丐入寇河東殺掠吏民三城護軍張昌等要擊走之

九月己丑月犯左角占曰天下有兵神瑞元年十二月
蠕蠕犯塞

十月乙己月犯畢占曰貴人有死者泰常元年三月長
樂王處文薨

十一月丙戌月蝕房第一星

十二月甲辰三暈東井

神瑞元年正月丁卯月犯畢占曰貴人有死者泰常元
年四月庚申河間王修薨

二月戊申月蝕房第一星

三月壬申月蝕左角

五月壬寅月犯牽牛南星

六月丙申月掩氐

七月庚辰月犯天關

八月丁酉月蝕牽牛中大星

己酉月犯西咸占曰有陰謀神瑞二年三月河西饑胡屯聚上黨推白亞栗斯爲盟主號大單于稱建平元年四月詔將軍公孫表等五將討之

二年三月丁巳月入畢占曰天下兵起泰常元年三月

常山民霍季自言名載圖讖持一黑石以爲天賜玉印
誑惑聚黨入山爲盜州郡捕斬之

四月己卯月犯畢陽星

七月辛丑月犯畢占日貴人有死者泰常元年十二月
南陽王良薨

八月壬子月犯氏

十月甲子月暈畢

十一月月暈軒轅

戊午月犯畢陽星

泰常元年五月甲申月犯歲星在角

六月己巳月犯畢占曰貴人死二年十月豫章王夔薨
七月月犯牛

十月丙戌月入畢占曰有邊兵二年二月司馬德宗譙
王司馬文思自江東遣使詣闕上書請軍討劉裕太宗
詔司徒長孫嵩率諸將邀擊之

二年五月丙子月犯軒轅

八月己酉月犯牽牛占曰其地有憂三年司馬德宗死
丁卯月犯太微

十一月癸未月犯東井南轅西頭第一星占曰諸侯貴
人死一曰有水三年八月鴈門河內大雨水復其租稅

五年三月南陽王意文薨

二年正月戊申月犯輿鬼積尸己酉月犯軒轅燿星占
曰女主有憂五年六月丁卯貴嬪杜氏薨後諡密皇后
四月壬申月犯鎮星在張

五月癸亥月犯太白於東井

七月丁巳月犯東井

九月丙寅月犯熒惑在張翼

十一月庚申月犯太白在斗

十二月庚辰月犯熒惑於太微

四年正月丙午月犯太微

三月壬寅月犯太微

五月丙申月犯太微占曰人君憂八年十一月太宗崩
十二月丁巳月犯太白入羽林

五年十一月辛亥月蝕熒惑在亢占曰韓鄭地大敗八
年九月劉義符潁川太守李元德竊入許昌太宗詔交
趾侯周幾擊之元德遁走

六年二月己亥月蝕南斗杓星

五月丙辰月暈在角亢

七年正月丁卯月犯南斗占曰大臣憂三月河南王曜
薨

三月壬戌月犯南斗

五月丙午月犯軒轅

六月辛巳月犯房占日將相有憂八年六月己亥太尉
宜都公穆觀薨

世祖始光元年正月壬午月犯心中央大星

二年三月丙子月犯熒惑在虛

十二月丁酉月犯軒轅

神麈三年夏四月壬戌月犯軒轅

六月月犯歲星

四年十月丙辰月掩天關占曰有兵延和元年七月世

祖討馮文通於和龍

十二月月犯房鉤鈴

延和元年三月月犯軒轅

四月月犯左角占曰天下有兵二年二月征西將軍金崖與安定鎮將延普及涇州刺史狄子玉爲權舉兵攻普不克退保胡空谷驅掠平民據險自固世祖詔平西將軍安定鎮將陸俟討獲之

五月月犯軒轅掩南斗第六星

七月丙午月蝕左角

三年二月庚午月犯畢口而出月暈昴五車及參占曰

貴人死五月甲子陰平王求薨

閏月己丑月入東井犯太白占曰憂兵七月辛巳世祖行幸隰城命諸軍討山胡白龍于西河克之

太延元年五月壬子月犯右執法占曰執法有憂十月尚書左僕射安原謀反伏誅

十月丙午月犯右執法

二年正月庚午月犯熒惑占曰貴人死三年正月癸未征東大將軍中山王纂薨

二月月犯太微東藩第一星

三月癸亥月犯太微右執法又犯上相占曰將相有免

者真君二年三月庚戌新興王俊略陽王羯兒有罪並
黜爲公

三年正月月犯東井占曰將相死戊子太尉北平王長
孫嵩薨乙巳鎮南大將軍丹陽王叔孫建薨

九月丙申月暈太微

十一月戊戌月掩太白

四年四月己卯月犯氏

十一月丁未月犯東井占曰將軍死真君二年九月戊
戌撫軍大將軍永昌王健薨

五年六月甲午朔月見西方

七月月掩鎮星

真君元年十二月月犯太微

二年六月壬子朔月見西方

三年三月癸未月犯太白占曰憂兵四年正月征西將軍皮豹子等大破劉義隆將於樂鄉擒其將王奐之王長卿等

五年五月甲辰月犯心後星

六年四月月犯心占曰有亡國是月征西大將軍高涼王那討吐谷渾慕利延於陰平軍到曼頭城慕利延驅其部落西渡流沙那急追之故西秦王慕瓚世子被囊

逆軍距戰那擊破之慕利延遂西入于闐

七年八月癸卯月犯熒惑又犯軒轅

十一月月犯軒轅

八年正月庚午月犯心大星

九年正月月犯歲星

十一年正月甲子月入羽林

正平元年正月月入羽林

高宗太安四年正月己未月入太微犯西蕃

三月月犯五諸侯

六月癸酉朔月生西方

八月月入南斗

九月月犯軒轅

十二月月犯氐

五年正月月掩軒轅又掩氐東南星

六月月犯心前星

十二月月犯左執法占曰大臣有憂和平二年四月侍
中征東大將軍河東王閼毗薨

和平元年正月丁未月入南斗

三月月掩軒轅占曰女主惡之四月保皇太后常氏崩
六月戊子月犯心前星

十一月壬辰月犯右執法

二年正月月犯心後星

九月月犯心大星

三年三月壬寅月犯心後星

八月月犯哭星

四年四月月掩軒轅御女星

五年二月甲申月入南斗魁中犯第三星

三月庚子月入輿鬼積尸

六年七月月犯心前星

九月月犯軒轅右角

顯祖天安元年六月甲辰月犯東井

十月癸巳月掩東井

皇興元年正月丙辰月犯東井北轅東頭第三星

八月辛酉月蝕東井南轅第二星占曰有將死三年正月司空平昌公和其奴薨

十月癸巳月在參蝕

二年四月丙辰月犯牽牛中星

三年十二月乙酉月犯氐

五年七月辛巳月犯東井

高祖延興元年十月庚子月入畢口占曰有赦二年正

月乙卯曲赦京師及河西南至秦涇西至枹罕北至涼州及諸鎮

二年正月壬戌月犯畢占曰天子用法九月辛巳統萬鎮將河間王閻虎皮坐貪殘賜死

閏月丙子月犯東井占曰有水是年以州鎮十一水旱免民田租開倉賑恤

庚子月犯東井北轅

三年八月己未月犯太微占曰將相有免者期不出三年承明元年二月司空東郡王陸定國坐事免官爵十二月戊午月蝕在七星京師不見統萬鎮以聞

四年正月己卯月犯畢占曰貴人死五年十二月城陽王長壽薨

二月癸丑月犯軒轅

甲寅月犯歲星占曰饑太和元年正月雲中饑詔開倉賑恤

九月乙卯月犯右執法占曰大臣有憂承明元年六月大司馬大將軍安成王萬安國坐矯詔殺部長奚買奴於苑中賜死

五年三月甲戌月掩鎮星

八月乙亥月掩畢占曰有邊兵太和元年正月秦州略

陽民王元壽聚衆五千餘家自號爲衝天王二月詔秦
益二州刺史武都公尉洛侯討破元壽獲其妻子送京
師

十一月癸卯月入軒轅中蝕第三星

承明元年四月甲戌月蝕尾

太和元年二月壬戌月在井暈參南北河五車二星三
柱熒惑

三月甲午月犯太微

戊辰月蝕尾下入濁氣不見

五月丁亥月犯軒轅大星

丙午月入太微

八月庚申月入南斗犯第三星

戊寅月入太微犯屏南星

十月乙丑月蝕昴京師不見雍州以聞占曰貴臣誅是月誅徐州刺史李訢

十二月癸卯月犯南斗

二年六月庚辰月犯太微東蕃南頭第一星京師不見定州以聞

甲申月犯房又犯太微

八月壬午月入南斗占曰大臣誅十二月誅南郡王李

惠

九月庚申陰雲開合月在昴蝕

十月戊戌月入南斗口中占曰大臣誅三年四月雍州刺史宜都王目辰有罪賜死

十一月甲子月犯鎮星

十二月戊戌月入南斗口中

三年正月壬子月暈觜參兩肩五車五星畢東井占曰有赦十月大赦天下

二月庚寅月犯心

三月庚戌月入南斗口中占曰大臣誅九月定州刺史

安樂王長樂有罪徵詣京師賜死

乙卯月入南斗口中

七月癸未月犯心

十月月犯心

十二月丙戌月犯太微左執法占曰大臣有憂四年正月襄城王韓頽有罪削爵徙邊

四年正月丁未月在畢暈參兩肩五車東井丁巳月犯心占曰人伐其主五年二月沙門法秀謀反伏誅

關犯心

二月己卯月犯軒轅北第二星

辛巳月犯太微左執法占曰大臣有憂閏月頓丘王李
鍾葵有罪賜死

壬午月蝕

乙酉月掩熒惑

五年二月癸卯月犯太微西蕃南頭第一星

二月甲辰月在翼暈東南不帀須臾西北有偏白暈侵
五車二星東井北河北河輿鬼柳北斗紫微宮攝提翼
星

戊戌月犯心京師不見濟州以聞

七月戊寅月犯昴占曰有白衣之會六年正月任城王

雲薨

六年正月癸亥月在畢暈參兩肩五車三星胃昴畢京師不見營州以聞

己巳月在張犯軒轅大星

辛未月蝕

五月戊申月入南斗口中

戊寅月犯昴

七月丁卯月蝕

十一月辛亥朔月寅見東方京師不見平州以聞

七年五月辛卯月犯南斗

八年正月辛巳月在畢暈東井歲星觜參兩肩五車

三月己丑月犯心

四月丁亥月蝕斗

癸亥月犯昴相州以聞占曰有白衣之會十一年五月

南平王渾薨

五月丁亥月在斗蝕盡占曰饑十二月詔以州鎮十五
水旱民飢遣使者循行問所疾苦開倉賑恤

九年正月丁丑月在參暈觜參兩肩東井北河五車三
星占曰水是年冀定數州水民有賣男女者

戊申月犯東井占曰貴人死一曰有水十月侍中司徒

魏郡王陳建薨是年京師及州鎮十二水旱傷稼

四月丁未月犯心

十一月戊寅月蝕

十年十一月辛亥月犯房

十一年正月丙午月犯房鈞鈴

二月癸亥月犯東井

三月丙申月三暈太微

庚子月蝕氏占日糴貴是年年穀不登聽民出關就食

開倉賑恤

六月乙丑月犯斗

丙寅月犯建星

七月丁未月入東井

八月己巳月蝕胃占日有兵是月蠕蠕犯塞遣平原王
陸叡討之

九月戊戌陰雲離合月在胃蝕

十一月乙巳月入氐

十二月戊午月及熒惑合於東壁

甲子月入東井犯天關

十二年正月戊戌月犯左角

二月壬戌月暈太微

丁卯月犯氐

四月癸丑月犯東井占曰將死九月司徒淮南王他薨
壬戌月犯氐與歲星同在氐

癸亥月犯房

六月丁巳月入氐犯歲星

七月乙酉月犯房

庚寅月犯牽牛

庚子月犯畢

九月月蝕盡

十一月己未月犯東井

丙寅月犯左角占曰天下有兵十二年正月蕭蹟遣衆寇邊淮陽太守王僧儁擊走之

十二月甲申月犯畢

乙未月犯氐

丙申月犯房

十三年正月甲寅月入東井

壬戌月掩牽牛

二月己丑月在角十五分蝕七

三月庚申月犯歲星

四月丙戌月犯房

六月乙酉月掩牽牛

乙未月犯畢占曰貴人死十二月司空河東王苟頽薨
七月丁未月入氐

戊申月犯鍵閉

八月丙戌天有微雲月在未蝕占曰有兵十四年四月
地豆于頻犯塞詔征西大將軍陽平王頤擊走之

九月丁巳月掩畢

庚申月入東井

十月己卯月掩熒惑又掩畢

丁酉月犯鍵閉

十二月壬午月入東井

十四年二月甲戌月犯畢

六月甲戌月犯亢

八月乙亥月犯牽牛

辛卯月犯軒轅占曰女主當之九月文明皇太后馮氏
崩

十月壬午月入東井

戊子月犯太微

十一月戊戌月犯鎮星

乙卯月犯太微右執法

十二月庚辰月犯軒轅

癸未月掩太微左執法

十五年正月己酉月在張蝕

三月丙申月掩畢占曰有邊兵十六年八月詔陽平王
頤右僕射陸叡督十二將七萬騎北討蠕蠕

四月庚午月犯軒轅

癸酉月犯太微東蕃上將占曰貴人憂六月濟陰王鬱
以貪殘賜死

癸未月犯歲星

五月庚子月掩太微左執法占曰大臣憂十七年二月

南平王霄薨

丁未月掩建星

七月乙未月犯太微東蕃

辛丑月掩建星

癸卯月犯牽牛

九月乙丑月犯牽牛占曰大臣有憂十七年蕭蹟死

大臣

疑當作
吳越

癸未月入太微犯右執法占曰大臣憂十七年八月三
老山陽郡開國公尉元薨

十月甲午月犯鎮星

戊申月犯軒轅

十一月乙巳月犯畢

辛未月入東井

十二月辛卯月蝕盡

十六年二月甲辰月入氐

三月己卯月入羽林

四月壬辰月入太微

丙午月入羽林

五月壬子月掩南斗第六星

甲戌月入羽林

六月戊子月犯熒惑占曰貴人死十九年五月廣川王
諸薨

己丑月入太微

丁酉月掩建星

丁未月入畢占曰有邊兵十九年正月平南將軍王肅
頰破蕭鸞軍於義陽降者萬餘

七月甲戌月入畢

丁丑月犯軒轅

八月壬辰月犯建星

壬寅月犯畢

甲辰月入東井

戊申月犯軒轅占曰女主當之二十年十月廢皇后馮氏

辛亥月入太微犯右執法

九月癸亥月掩鎮星

十月辛卯月入羽林

癸亥月入東井

十一月甲子月犯畢

壬申月入太微

丁丑月入氐

十二月丁酉月在柳蝕占曰國有大事兵起十七年八月己丑車駕發京師南伐步騎三十餘萬

十七年正月己丑月犯軒轅

壬申月犯氐

三月甲午月入太微

壬寅月掩南斗第六星

四月癸丑月入太微占曰大臣死十九年二月辛酉司徒馮誕薨

壬寅月入羽林

五月甲子月犯南斗第六星

乙丑月掩建星

六月甲午月在女蝕占日旱二十年以南北州郡旱遣侍臣循察開倉賑恤

七月壬子月入太微占日有反臣二十年二月恒州刺史穆泰謀反伏誅多所連及

丙辰月入氐

癸未月犯南斗第六星

庚申月犯建星

八月庚寅月犯哭星

辛卯月入羽林

丁酉月入畢占曰兵起十九年二月車駕南伐鍾離

辛丑月犯輿鬼

乙巳月入太微犯屏星

十月壬午月犯建星

甲午月入東井

十一月壬子月犯哭星

辛酉月犯東井前星

丁卯月入太微占曰大臣死有反臣二十七年四月大將軍宋王劉昶薨廣州刺史薛法護南叛

壬申月入氐

十二月辛巳月入羽林

乙未月入太微

己亥月入氐

十八年二月甲午月入氐

四月庚申月在斗蝕

六月丁卯月入東井

十九年三月己卯月犯軒轅占曰女主當之二十一年

十月追廢貞皇后林氏爲庶人

二十年七月辛巳月掩鎮星

十月丙午月在畢蝕

二十一年三月丁酉月犯屏星

四月庚午月掩房星

六月丁卯月掩斗魁

十二月乙亥月掩心

二十二年正月丙申月掩軒轅占曰女主當之二十三年詔賜皇后馮氏死

二月乙丑月與歲星熒惑合於右掖門內

丁卯月在角蝕占曰天子憂二十三年四月高祖崩

七月乙酉月掩心

九月庚申月蝕昴

二十三年二月壬戌月在軫蝕

六月癸未月掩房南頭第二星

甲申月掩箕北頭第一星

八月月在壁蝕子己上

十一月癸丑月在畢暈昴觜參五車

十二月己卯月掩昴

辛巳月掩五車

世宗景明元年正月丙辰月在翼蝕十五分蝕三

十二月癸未月暈太微既而有白氣長一匹廣二尺許
南至七星俄而月復暈北斗大角

丁亥月暈角亢房

二年正月甲辰月暈井觜參兩肩昴五車占曰貴人死
大赦二月甲戌大赦天下五月壬子廣陵王羽薨

二月丙子月掩軒轅大星占曰女主憂正始四年十月
皇后于氏崩

癸未月掩房南頭第二星丙戌月入南斗距星南三尺
占曰吳越有憂十二月蕭寶卷直後張齊玉殺寶卷
五月丙午月掩心第三星

戊申月掩斗魁第三星

七月辛亥月暈婁內青外黃轆昴畢天船大陵卷舌奎

婁

三年正月甲寅月入斗去魁第二星四寸許占曰吳越有憂四月蕭衍又廢其主寶融

四月癸酉月乘房南頭第二星

己亥月暈在角亢氏房心

六月戊戌月掩南斗第二星

八月壬寅月暈外青內黃轆昴畢婁胃五車占曰貴人死乙卯三老元丕薨

己酉月犯軒轅

十一月己巳月蝕井盡

十一月壬辰月掩昴占曰有白衣之會正始二年四月
城陽王鸞薨

乙未月暈參井鎮星占曰兵起四年氏反行梁州事楊
椿左將軍羊祉大破之

丙申月掩鎮星又暈

四年正月庚申月暈胃昴參五車

二月辛亥月掩太白

三月辛酉月暈軒轅太微西垣帝座

四月丙申月掩心大星

五月丁卯月在斗從地下蝕出十五分蝕十二占曰饑

正始四年八月敦煌民飢開倉賑恤

六月癸卯月犯昴占曰有白衣之會永平元年三月皇子昌薨

丁未月掩太白

七月戊午月犯房大星

壬申月犯昴畢觜參東井五車五星占曰旱有大赦正始元年正月丙寅大赦改年六月詔以旱徹樂減膳十二月丁亥月暈昴畢婁胃

己未月暈太微帝座軒轅

庚子月暈房心亢氏占曰有軍大戰正始元年荊州刺

史楊大眼大破羣蠻樊秀安等

正始元年正月乙卯月暈胃昴畢五車二星

丁巳月暈婁胃昴畢

戊戌月暈五車三星東井南河北河輿鬼鎮星

二月甲申月暈昴畢參左肩五車

二年九月癸未月在昴十五分蝕十占曰饑四年九月
司州民飢開倉賑恤

十一月丙子月暈東西兩珥內赤外青東有白虹長二
丈許西有白虹長一匹北有虹長一丈餘外赤內青黃
虹北有背外赤內青黃

三年正月辛巳月暈太微帝坐軒轅左角賁疑星

三月庚辰月在氏蝕盡

十月甲寅月犯太白

永平元年五月丁未月犯畢占曰貴人有死者九月殺
大師彭城王勰

六月己巳月掩畢

十一月癸酉月犯左執法占曰大臣有憂四年三月壬
戌廣陽王嘉薨

二年正月甲午月在翼十五分蝕十二

十一月丙戌月掩畢大星

三年正月戊子月在張蝕

閏月乙酉月在危蝕

十一月壬寅月犯太白

十二月壬午月在張蝕

四年四月癸酉月暈太微軒轅占曰小赦延昌二年八月諸犯罪者恕死從流已下減降

辛卯月犯太白於胃

八月癸丑月掩輿鬼

丁巳月入太微占曰大臣死延昌元年三月己未尚書

左僕射安樂王詮薨

辛酉月犯太白

十月壬午月失行黃道北犯軒轅大星

甲申月入太微

十一月乙巳月犯畢占曰爲邊兵十一月戊甲詔李崇
奚康生治兵壽春以討胸山之寇

延昌元年二月庚午月暈東井輿鬼軒轅大星

三月辛丑月在翼暈須臾之間再成再散

壬寅月犯太微

乙巳月暈角亢房心鎮歲

九月丁卯月及熒惑俱在七星

十月癸酉月暈東井五車畢參占曰大旱一曰爲水二年四月庚子出絹十五萬疋賑恤河南飢民五月壽春水

十二月戊戌月犯熒惑於太微占曰君死不出三年四年正月世宗崩

二年正月庚子月暈暈東有連環轆亢房鎮織女天棊紫宮北斗

二月己巳月暈熒惑軒轅太微帝座占曰旱六月乙酉青州民飢詔開倉賑恤

四月丙申月掩鎮星

己亥月在箕從地下蝕出還生三分漸漸而滿占曰饑
三年四月青州民飢開倉賑恤

六月乙巳月犯畢左股占曰爲邊兵二年六月南荊州
刺史栢叔輿破蕭衍軍於九江

七月戊午月掩鎮星

十月丙申月在參蝕盡占曰軍起三年十一月詔司徒
高肇爲大將軍率步騎十五萬伐蜀

三年二月乙酉月暈畢昴太白東井五車

四月癸巳月在尾從地下蝕出十五分蝕十四占曰旱
饑熙平元年四月瀛州民飢開倉賑恤

九月丁卯月犯太微屏星

十月壬寅月犯房第二星

十二月丙午月掩熒惑

四年五月庚戌月犯太微占曰貴人憂九月安定王燬薨

九月乙丑月犯太微

十月癸巳月入太微占曰大臣死熙平二年二月太保領司徒廣平王懷薨

閏月戊午月犯軒轅占曰女主憂之神龜元年九月皇太后高尼崩于瑤光寺

肅宗熙平元年八月己酉月在奎十五分蝕八占曰有兵神龜元年三月南秦州氏反遣龍驤將軍崔襲持節喻之

十二月戊戌月犯歲星

甲辰月暈東井觜參五車占曰大旱一曰水二年十月庚寅幽冀滄瀛四州大饑開倉賑恤

二年二月丁未月在軫蝕

四月癸卯月犯房

八月癸卯月在婁蝕盡

九月癸酉月犯畢占曰貴人有死者神龜元年四月丁

西司徒胡國珍薨

十月癸卯月暈昴畢觜參五車四星

甲辰月暈畢右股觜參五車三星東井占曰天下饑大赦神龜元年正月幽州大饑死者甚衆開倉賑恤又大赦天下

十一月戊戌月暈觜參東井

壬子月犯心小星

神龜二年二月丙辰月在參暈井觜參右肩歲星五車四星占曰有相死十二月司徒尚書令任城王澄薨八月辛未月犯軒轅

十二月庚申月在柳十五分蝕十

正光元年正月戊子月犯軒轅大星占曰女主有憂七月丙子元乂幽靈太后於北宮

十二月甲寅月蝕占曰兵外起二年正月南秦州氏反二月詔光祿大夫郗虬討之

二年五月丁未月蝕占曰旱饑三年六月帝以炎旱減膳撤懸

七月乙卯月在昴北三寸

九月庚戌月暈胃昴畢五車二星

辛亥月暈昴畢觜參兩肩五車五星占曰有赦三年十

卷之二十一 天象記
三十一
一月丙午太赦天下

十月辛卯月掩心大星

十一月己酉月在井蝕

乙卯月犯昴

三年正月甲寅月掩心距星

二月丁卯月掩太白京師不見涼州以聞

甲戌月在張暈軒轅太微右執法歲星

四月丁丑月掩心距星

九月丙午月在畢暈昴畢觜參兩肩五車四星

四年正月戊戌月在井暈東井南河轅觜參右肩一星

五車一星

七月乙巳月在胃暈婁胃昴畢觜占曰貴人死四年十一月丁酉太保崔光薨

八月乙亥月在畢掩熒惑

五年二月庚寅月在參暈畢觜參兩肩東井熒惑五車一星占曰兵起六月秦州城人莫折大提據城反自稱秦王詔雍州刺史元志討之

閏月壬辰月在張暈軒轅太微西蕃占曰天子發軍自衛孝昌三年正月己丑詔內外戒嚴將親出討

癸巳月在翼暈太微張翼占曰士卒多逃走一曰士卒

大聚十月營州城人劉安定就德興反執刺史李仲遵
其部下王惡兒斬安定以降德興東走自號燕王
八月丙申月在昴暈胃昴五車二星畢觜參一肩
十二月癸未月在婁暈奎婁胃昴

孝昌元年九月丁巳月蝕

十月丙戌月在畢暈昴畢觜兩肩五車二星

二年八月甲申月在胃掩鎮星

閏月癸酉月掩鎮星

三年正月戊辰月犯鎮星於婁相去七寸許光芒相及
占曰國破期不出三年一曰天下有大喪武泰元年二

月癸丑肅宗崩四月庚子爾朱榮害靈太后及幼王又害王公已下

癸酉月在井暈觜參兩肩南北河五車兩星占曰有赦七月己丑大赦天下

武泰元年三月庚申月掩畢大星

庚午月在軫暈太微角

莊帝建義元年七月丙子月在畢掩大星

永安元年十一月丙寅月在畢大星東北五寸許光芒相掩

十二月辛卯月在婁暈奎歲星胃昴

癸巳月掩畢大星

二年三月乙卯月入畢口占曰大兵起壬戌詔大將軍上黨王天穆與齊獻武王討邢杲

四月己丑月在翼入太微在屏星西南相去一尺五寸須臾下沒

辛卯月在軫暈太微軫角

乙丑月在危

八月乙丑月在畢左股第二星北相去二寸許光芒相掩須臾入畢占曰兵起三年正月辛丑東徐州城民呂文欣等反殺刺史行臺樊子鵠討之

十月辛亥月在畢暈畢昴鎮星觜參井五車四星占曰
兵起大赦三年三月万俟醜奴遣其大行臺尉遲菩薩
寇岐州大都督賀拔岳可朱渾道元大破之四月大赦
天下

甲子月在參蝕

十二月丙辰月掩畢右股大星

乙丑月熒惑同在軫

丁巳月在畢暈昴畢及鎮星觜參伐五車四星占曰大
赦三年九月大赦天下

癸亥月在翼暈軒轅翼太微占曰有赦三年十月戊申

皇子生大赦天下

乙丑月在軫掩熒惑

三年正月己丑月入太微襲熒惑

辛卯月行太微中暈太微熒惑

壬辰月在軫掩熒惑

四月戊午月暈太微

五月甲申望前月蝕於午洪範傳曰天子微弱大法失

中不能立功成事則月蝕望前時爾朱榮等擅朝也

六月乙巳月在畢大星北三寸許光芒相掩

八月庚申月入畢口犯左股大星

辛丑月入軒轅后星北夫人南直東過太白犯次妃占
曰人君死又爲兵起十二月爾朱兆入洛執帝殺皇子
亂兵汗辱後宮殺司徒公臨淮王彧

九月庚寅月在參暈昴觜參井歲鎮二星五車三星

十月辛亥月暈東壁

十一月辛丑月在太白北中不容指

前廢帝普泰元年正月己丑月在角暈軫角亢亦連環
暈接北斗柄三星大角織女

五月甲申月蝕盡

己未月犯畢右股第一星相去三寸許光芒相及又入

畢口

十月癸丑月暈昴觜參東井五車三星占曰有赦是月齊獻武王推立後廢帝大赦天下

後廢帝中興元年十一月甲申月暈
二年四月戊寅月在箕蝕

出帝太昌元年六月癸未月戴珥

九月甲寅月入太微犯屏星

十月丙子月在參蝕

永熙二年十一月乙丑月在畢暈昴觜參兩肩五車五星

三年三月戊戌月在亢蝕

八月庚午月在畢暈昴畢觜參五車四星占曰大赦是月戊辰大赦天下

孝靜天平元年十二月庚申月在畢暈昴畢觜參兩肩五車五星

閏月庚子月掩心中央星

三年三月月暈北斗第二星占曰糴貴兵聚是月齊獻武王討山胡劉蠡升斬之三年并肆汾建諸州霜儉壬申月在婁太白在月南一寸許至明漸漸相離

八月己卯月在心去心中央大星西廂七寸許

十一月戊辰月在心掩前小星

三年春正月丁卯月掩軒轅大星

二月丁亥月蝕

八月癸未月蝕

十月丁丑月在熒惑北相去五寸許

四年二月壬申月掩五車東南星

庚辰月連環暈北斗

八月癸未月掩五車東南星

元象元年三月丁卯月掩軒轅大星

六月癸卯月蝕

十月己亥陰雲班駁月在昴暈胃昴畢占曰大赦興和
元年五月大赦天下

丁未月在翼暈太微軒轅左角軫二星

十一月庚午月在井暈五車一星及東井南北河占曰
有赦興和元年十一月大赦改年

興和元年八月辛丑月在畢暈畢觜參兩肩五車

九月丁巳月在斗犯魁第二星相去三寸許光芒相及
丁卯月掩昴

十二月甲午月蝕

二年八月己酉月犯心中央大星

三年春正月辛巳月在畢暈東井參兩肩畢西轅昴五車五星占曰大赦武定元年正月大赦改元

四月壬辰月蝕

八月丁巳月在胃暈畢歲星昴婁胃五車一星須臾暈缺復成

四年十一月壬午月在七星暈熒惑軒轅太微帝座十二月壬寅月在昴暈昴畢五車兩星占曰有赦武定二年三月齊獻武王歷冀定二州因入朝以今春亢旱請蠲懸租賑窮乏死罪已下一皆原宥

武定元年三月丙午月蝕

四年正月己未月蝕軫

十月癸巳月入畢中

九月癸亥月在翼暈軒轅太微帝座熒惑占曰兵起是月北徐州山賊鄭土定自號郎中偷陷州城儀同斛律平討平之

五年正月乙巳月犯畢大星昴東井觜參五車二星占曰大赦五月丁酉朔大赦天下

庚辰月在張暈軒轅大星太微天庭

七年九月戊午月在斗掩歲星占曰吳越有憂是歲侯景破建業吳人餓死及流亡者不可勝數

十一月丁卯月蝕

魏書卷一百五之二

魏書卷一百五之二考證

太宗永興五年三暈東井○三南監本作月

臣人龍按

本卷第十七頁有云三月丙申月三暈太微此當是三字上脫去月字

世祖延和元年及涇州刺史狄子玉爲權○本書世祖紀征西將軍金崖與安定鎮將延普及涇州刺史狄子玉爭權構隙此爲字乃爭字之訛也

高祖太和四年

闕

犯心○所闕之字南監本作戊午月

當亦誤也係何月戊午耶或此犯心二字重出

高祖太和五年北河北河○兩北河字其一必南河之

訛也或重出

世宗景明三年左將軍羊祉○本書世宗紀景明四年
梁州氏楊會反詔行梁州事楊椿左將軍羊祉討之
此祉字乃祉字之訛也

魏書卷一百五之二考證

魏書卷一百五之三

齊

魏

收

撰

志第三

天象一之三

太祖皇始元年夏六月有星彗于髦頭彗所以去穢布
新也皇天以黜無道建有德故或馮之以昌或繇之以
亡自五胡蹂躪生人力正諸夏百有餘年莫能建經始
之謀而底定其命是秋太祖啓冀方之地寔始芟夷滌
除之有德教之音人倫之象焉終以錫類長代修復中
朝之舊物故將建元立號而天街彗之蓋其祥也先是

有大黃星出於昴畢之分五十餘日慕容氏太史丞王先曰當有真人起於燕代之間大兵鏘鏘其鋒不可當冬十一月黃星又見天下莫敵

是歲六月木犯哭星木人君也君有哭泣之事

是月太后賀氏崩至秋晉帝殂

二年六月庚戌月掩金于端門之外戰祥也變及南宮是謂朝廷有兵時燕王慕容寶已走和龍秋九月其弟賀麟復糾合三萬眾寇新市上自擊之大敗燕師于義臺悉定河北而晉桓玄等連衡內侮其朝廷日夕戒嚴

是歲正月火犯哭星占有死喪哭泣事秋八月又守井鉞占曰大臣誅十月襄城王題薨明年正月右軍將軍

尹國於冀州

謀反被誅

天興元年八月戊辰木晝見胃胃趙代墟也闕天之事
歲爲有國之君晝見者並明而干陽也天象若曰且有
負海君實能自濟其德而行帝王事是月始正封畿定
權量肆禮樂頒官秩十二月羣臣上尊號正元日遂禋
上帝于南郊由是魏爲北帝而晉氏爲南帝

元年十月至二年五月月再掩東蕃上相相所以蕃輔
王室而定君臣位天象若曰今下凌上替而莫之或振
將焉用之哉且日中坐成刑貴人奪勢是歲桓玄專殺
殷仲堪等制上流之衆晉室由是遂卑

是歲五月辰星
犯軒轅大星占

曰女主當之三年三月至七月月再犯鎮星于牽牛又
犯哭星爲兵喪女憂或日月爲疆大之臣鎮所以正綱

紀也是爲彊臣有干犯者在吳越旣而晉
太后李氏殂桓立擅命江南仍有艱故云

三年三月有星孛于奎歷閣道至紫微西蕃入北斗魁
犯太陽守循下台輔南宮履帝坐遂由端門以出奎是
封豨剝氣所由生也又殷徐州之次桓立國焉劉裕興
焉天象若曰君德之不建人之無援且有權其列蕃盜
其名器之守而荐食之者矣又將由其天步席其帝庭
而出號施令焉至四年二月甲寅有大流星衆多西行
歷牛虛危絕漢津貫太微紫微虛危主靜人牽牛主農
政皆負海之陽國也天象若曰黎元喪其所食失其所
係命卒至流亡矣上不能恤又將播遷以從之其後晉

人有孫恩之難而桓玄踵之三吳連兵荐饑西奔死亡

者萬計竟篡晉主而流之尋陽既又劫之以奔江陵

是歲

三月甲子月生齒占曰有賊臣七月丁卯月犯天關關所以制畿封國也月犯之是爲兵起于郊旬十月甲子月又犯東蕃上相占同二年既而桓玄戡金陵殺司馬元顯太傅道子是歲秀容胡師亦聚衆反伏誅

五年四月辛丑月掩辰星在東井月爲陰國之兵辰象

戰鬪占曰所直野軍大起戰不勝亡地家臣死冬十月

帝伐秦師于蒙坑大敗之遂舉乾壁關中大震其上將

姚平赴水死

是月戊申月暈左角太史令晁崇奏角蟲將死上慮牛疫乃命諸將併重焚車丙戌

車駕北引牛大疫死者十有八九官車所御巨犗數百同日斃於路側首尾相屬麋鹿亦多死者

五年三月戊子太白犯五諸侯晝見經天九月己未又

魏進賢太白爲疆侯之誠犯五諸侯所以興霸形也是
時桓玄擅征伐之柄專殺諸侯以弱其本朝卒以干君
之明而代奪之故皇天著誠焉若曰夫進賢興功大司
馬之官守也而今自殘之君於何有焉是冬十月客星
白若粉絮出自南宮之西十二月入太微亂氣所由也
以距乏之氣而乘粹陽之天庭適足以驅除焉爾明年
竟篡晉室得諸侯而不終是歲五月丙申月犯太微十
月乙卯又如之月者太陰臣
象太微正陽之庭不當橫行其中是謂朝廷間隙疆臣
不制亦桓玄之誠也又占曰貴人有坐之者明年七月
鎮西大將軍毘陵王
順以罪還第亦是也

五年七月己亥月犯歲星在鶉火鳥帑南國之墟也至

天賜元年二月甲辰又掩之在角角爲外朝而歲星君也天象若曰有疆大之臣干君之庭以挾其主而播遷于外是歲桓玄之師敗績于劉裕玄劫晉帝以奔江陵至五月玄死桓氏之黨復攻江陵陷之凡再劫天子云

先是六年六月甲辰月掩斗魁第四星至天賜元年五月壬申又掩斗魁第三星二年八月丁巳又犯斗第一星斗爲吳分大人憂將相戮宮中有自賊者及桓玄伏誅貴臣多戮死者江南兵革十餘歲乃定故謫見于斗

天賜二年四月己卯月犯鎮星在東壁七月己未又如之十月丁巳又掩之在室夫室星所以造宮廟而鎮司空也占曰土功之事興明年六月發八部人自五百里內繕修都城魏於是始有邑居之制度或曰北宮後庭

人主所以庇衛其身也鎮主后妃之位存亡之基而是時堅冰之漸著矣故犯又掩再三焉占曰臣賊君邦大喪是歲三月丁酉月犯心前星三年二月月犯心後星四年二月又如之心主嫡庶之禮占曰亂臣犯主儲君失位庶子惡之先是天興六年冬十月至元年四月月再掩軒轅占曰有亂易政后妃執其咎三年五月壬寅熒惑犯氏氏宿宮也天戒若曰是時蠱惑人主而興內亂之萌矣亦自我天視而修省焉及六年七月宣穆后以彊死太子微行人間既而有清河萬人之難

二年八月火犯

斗丁亥又犯建斗爲大人之事建爲經綸之始此天所以建創業君時劉裕且傾晉祚而清河之釁方作矣帝

猶不悟至是歲九月火犯哭星其象若曰將以內亂至于哭泣之事焉由是言之皇天所以訓劫殺之主歟矣而罕能敦復以自悟悲夫

二年八月甲子熒惑犯少微庚寅犯右執法癸未犯左執法十一月丙戌太白掩鈞鈐皆南邦之謫也火象方伯金爲彊侯少微以官賢材而輔南宮之化執法者威令所由行也天象若曰夫祿去公室所由來漸矣始則奮其賢材以爲其本朝終以干其鈐鍔而席其威令焉至三年十二月丙午月掩太白于危危齊分也占曰其國以戰亡丁未金火皆入羽林四年正月太白晝見奎是謂或稱王師而干君明者占曰天下兵起魯邦受之

二月癸亥金火土水聚于奎婁徐魯之分也四神聚謀所以革衰替之政定霸王之命五月己丑金晝見于參天意若曰是將自植攻伐以震其主而代奪之云爾八月辛丑熒惑犯執法九月遂犯進賢與桓氏同占是時南燕慕容氏兼有齊魯之墟不務修德而驟侵晉淮泗六年四月劉裕以晉師伐之大敗燕師于臨朐進克廣固執慕容超以歸戕諸建康於是專其兵威荐食藩輔

篡奪之形由此而著云

二年三月月掩左執法三年四月又犯西蕃上將己未犯房次

相六月火犯房次將二年七月太尉穆崇薨四年誅定陵公和跋殺司空庾岳又四年六月火犯水左翼八月金掩火犯左執法占曰大兵在楚執法當之至五年火犯天江占曰水賊作亂六月金犯上將又犯左執法其

後盧循作亂於上流晉將何無忌戰死左僕射孟昶仰藥卒劉裕自伐齊奔命僅乃克之

六年六月金火再入太微犯帝座蓬孛客星及他不可勝紀太史上言且有骨肉之禍更政立君語在帝紀冬

十月太祖崩夫前事之感大卽後事之災深故帝之季

年妖怪特甚

是歲二月至九月月三犯昴昴爲白衣會宮車晏駕之徵也十二月辛丑金犯木於

奎占曰其君有兵死者旣而慕容超戮于晉是歲四月火犯水于東井其冬赫連氏攻安定秦主興自將救之自是侵伐不息或曰水火之合內亂之形也時朱提王悅謀反賜死

太宗永興二年五月己亥月掩昴昴爲髦頭之兵虜君

憂之是月蠕蠕社論圍長孫嵩于牛川上自將擊之社

論遁走道死

六月甲午太白晝見占曰爲不臣七月月犯鬼占曰亂臣在內明年五月昌黎王慕

容伯兒謀反誅之是歲三月至秋八月月三掩南斗第五星斗

吳分也且曰彊大之臣有干天祿者大人憂之是月乙

未太白犯少微晝見九月甲寅進犯左執法占曰且有

杖其霸刑以戮社稷之衛而專威令者徵在南朔先是

三月丁卯月掩房次將六月己丑又如之八月甲申犯

心前星占曰服輓者當之君失馭徵在豫州時劉裕謀

弱晉室四年九月專殺僕射謝混因襲荊州刺史劉毅

于江陵夷之明年三月又誅晉豫州刺史諸葛長人其

君託食而已是歲八月壬子太白犯軒轅大星占曰有亂易政女君憂三年十一月丙午金犯哭

星午秦地四年八月戊申月犯哭星申
晉地是月晉后王氏死其後姚主薨

三年六月庚子月犯歲星在畢八月乙未又犯之在參
四年正月又蝕在畢直微垣之陽參在山河之右歲星
所以阜農事安萬人也占曰月仍犯之邊萌阻兵而荐
饑是歲六月癸巳金木合于東井七月甲申金犯土于
井占曰其國內兵有白衣之會十一月土犯井十二月
癸卯土犯鉞土主疆理之政存亡之機也是爲土地分
裂有戮死之君徵在秦邦至五年二月丙午火土皆犯
井占曰國有兵喪之禍主出走是月壬辰歲填熒惑太
白聚于井將以建霸國之命也其地君子憂小人流又
自三年四月至五年三月熒惑三千鬼主命者將天而

國徙焉是時雍州假王霸之號者六國而赫連氏據朔方之地尤爲疆暴荐食關中秦人奔命者殆路間歲姚興薨而難作于內明年劉裕以晉師伐之秦師連戰敗績執姚泓以歸戕諸建康旣而遺守內攜長安淪覆焉或曰自上黨並河山之北皆鬼星參畢之郊也五年四月上黨羣盜外叛六月濩澤人劉逸自稱三巴王七月河西胡曹龍入蒲子號大單于十月將軍劉潔魏勤擊吐京叛胡失利勤力戰死潔爲所虜明年赫連屈子寇蒲子三城諸將擊走之其餘災波及晉魏仍其兵革之

禍

二年九月土犯畢爲疆場之兵三年七月木犯土于參占曰戰敗亡地國君死四年十月月掩天關其災

同上參外主巴蜀其後晉師伐蜀戮其主譙縱先是四年閏月月犯熒惑在昴七月又蝕之五年將軍奚斤討越勤大破之明年禿髮氏降于西秦其君儻檀戮死

神瑞元年二月填入東井犯天尊旱祥也天象若曰土失其性水源將壅焉施于天尊所以福矜寡之萌也先是去年九月至于五月歲再犯軒轅大星八月庚寅至二年三月填再犯鬼積尸歲星主農事軒轅主雪霜風雨之神返覆由之所以告黃祇也土爰稼穡鬼爲物之精氣是謂稼穡潛耗人將以饑而死焉一曰大旱是後京師比歲霜旱五穀不登詔人就食山東以粟帛賑乏

語在崔浩傳

先是月犯歲于畢占曰饑在晉代亦其徵又鬼主秦早在秦邦至二年太史奏熒惑

在匏瓜中一夜忽亡失之後出東井語
在崔浩傳旣而關中大旱昆明枯涸

是歲四月癸丑

流星晝見中天西行占曰營頭所首野有覆軍流血西
行謫在秦邦而魏人覲之亦王師之戒也天若戒魏師
曰是擁衆而西固欲干君之明而代奪之爾姑息人以
觀變無庸禦焉先是五年三月月犯太白于參八月庚
申又犯之參魏分野占曰彊侯作難國戰不勝九月己
丑月犯左角是歲三月壬申又蝕之是謂以剛晉之兵
合戰而偏將戮徵在兗州二年四月太白入畢月犯畢
而再入之占曰大戰不勝邊將憂魏邦受之六月己巳
有星孛于昴南天象若曰且有驅除之雄勿用距之于

朔方矣明年七月劉裕以舟師泝河九月裕陷我滑臺
兗州刺史尉建以畏懦斬時崔浩欲勿戰上難違衆議
詔司徒嵩率師逐之及晉人戰于畔城魏師敗績語在
崔浩傳裕既定關中遽歸受禪既而赫連氏并之遂竊
尊號云自元年正月至泰常元年十月月三犯畢再入
之再犯畢陽星占曰邊兵起貴人有死者元年
十二月蠕蠕犯塞上自將大破之二年上黨胡反詔五
將討平之泰常元年長樂河間南陽王皆薨二年豫章
王又薨常山霍
季聚衆反伏誅

二年四月辛巳有星孛于天市五月甲申彗星出天市
掃帝座在房心北市所以建國均人心宋分也國且殊
號人將更主其革而爲宋乎先是往歲七月月犯鈞鈴

十一月月食房上相至元年二月又如之天象若曰尚尸鈴鍵之位君憑而尊之者又將及矣是歲八月金木合于翼占曰且有內兵楚邦受之至泰常二年正月晉荊州刺史司馬休之雍州刺史魯宗之爲劉裕所襲皆出奔走是歲十月鎮星守太微七十餘日占曰易代立王其三年三月癸丑太白犯五諸侯如桓氏之占七月有流星孛于少微以入太微自劉氏之霸三變少微以加南宮矣始以方伯專之中則霸形干之又今孛政除之馴而三積堅冰至焉是月辰星見東方在翼甚明大翼楚邦也是爲冢臣干明賊人其昌

先是五年十一月壬子辰星出而明

盛非常至泰常二年十二月庚戌辰星過時而見光色明盛是爲彊臣有不還令者至是又如之亦三至焉或曰辰星以負北海九月長彗星孛于北斗轆紫微辛酉亦魏將大興之兆

入南宮凡八十餘日十二月彗星出自天津入太微逕

北斗于紫宮犯天棊八十餘日及天漢乃滅語在崔浩

傳是歲晉安帝殂後年而宋篡之夫晉室雖微泰始之

遺俗也蓋皇天有以原始篤終以哀王道之淪喪故猶

著二微之戒焉

神瑞二年四月木入南宮加右執法五月火又入南宮加左執法

法泰常元年六月又由掖門入太微五月火犯執法是冬土守天尊而月掩之三年八月土又入太微犯執法

因留二百餘日九月金又犯右執法十月火犯上將因留左掖門內二十日乃逆行四年三月出西蕃又還入

之繞填星成句已四月丙午行端門出皆晉氏之謫也自晉滅之後太微有變多應魏國也

泰常三年十月辛巳有大流星出昴歷天津乃分爲三
須臾有聲占曰車騎滿野非喪卽會明年四月帝有事
于東廟蕃服之君以其職來祭者蓋數百國也是歲正
月己酉月犯軒轅四月壬申又犯填星在張四年五月
辰星又犯軒轅占曰國有喪女君受之明年五月貴人
姚氏薨是爲昭哀皇后六月貴嬪杜氏薨是爲密后

先是

二年九月火犯軒轅三年
八月金又犯之占同也

四年自正月至秋七月月行四犯太微天象若曰太微
粹陽之天庭月者臣也今橫行輔之不已甚乎先是元
年五月月犯歲星在角是歲七月月又犯歲星明年宋

始建國後年而晉主殂裕鳩之也昔桓氏之難月再干
歲星再劫其主至是亦再犯之而再勦其君極其幽逼
之患而濟以篡殺之禍斯謂之甚矣

先是三年九月月犯火于鶉尾十二月

月又犯火于太微是歲五月月犯太白在井十月又犯
之在斗且再犯井星皆有兵水大喪諸侯有死者七月
鴈門河內大水五年三月南陽王意文死十一月
西涼李歆爲沮渠所滅晉君亦殂秦吳亡之應

五年十一月乙卯熒惑犯填星在角角外朝也土爲紀

綱火主內亂會于天門王綱將紊焉占曰有死君逐主

后妃憂之十二月月蝕熒惑在亢亢內庭也占曰君薨

而亂作于內貴臣以兵死是月客星見于翼翼楚邦也

占曰國更服邊有急將軍或謀反者六年二月月食南

斗杓星十月乙酉金土鬪于亢占曰內兵且喪更立王
公又兗州陳鄭之墟也有攻城野戰之象焉至十年正
月犯南斗三月壬戌又犯之斗爲人君受命又吳分是
歲五月宋武殂秋九月魏師侵宋北鄙十一月攻滑臺
克之明年拔虎牢陷金墉屠許昌遂啓河南之地八年
宋太后蕭氏死旣大臣專權遷殺其主卒皆伏誅自五年八
月至七年十二月熒惑一守軒轅再犯進賢再犯房星
一犯軒轅及房皆女君大臣之戒是時陽平河南王太
尉穆觀相次薨而未氏廷臣乘釁以侮其主竟以誅死
云或曰火犯土亢爲饑疾時官軍陷武牢會軍大疫死
者十二三是冬詔稟飢人

六年六月壬午有大流星出紫宮占曰上且行幸若有

大君之使明年駕幸橋山祠黃帝東過幽州命使者觀
省風俗十月上南征八年春步自鄴宮遂絕靈昌至東
郡觀兵成臯反自河內登太行山幸高都飲至晉陽焉
七年二月辛巳有星孛于虛危向河津占曰立柁所以
飾喪紀也宗廟並起司人疑更謀有易政之象十一月

甲寅彗星出室掃北斗及于闕門占曰內宮幾室主命

將易塞垣有土功之事其地又齊衛也八年正月彗星
出奎南長三丈東南掃河奎爲荐食之兵徐方之地占
曰西北之兵伐之君絕嗣天下饑七年十二月帝命壽
光侯叔孫建徇定齊地八年春築長城距五原二千餘

里置守卒以備蠕蠕冬十月大饑十一月己巳上崩于

西宮明年宋廢其主由是南邦日蹙齊衛之地盡爲兵

衝及世祖卽政遂荒淮沂以負東海云八年二月丙寅火守斗亦南邦

之謫也十一月彗星孛于土司空司空主疆理邦域且曰有土功哭泣事後年赫連屈子薨太武征之取新秦

之地由是征伐四克提封萬里云

世祖始光元年正月壬午月犯心大星心爲宋分中星者君也月爲大臣主刑事是歲五月宋權臣徐羨之謝晦傅亮放殺其主而立其弟宜都王是爲宋文帝至十月火犯心天戒若曰是復作亂以干其君矣十月壬寅大流星出天將軍西南行殷殷有聲占曰有禁暴之兵

上將督戰以所首名之三年正月歲星食月在張張南國之分歲之於月少君之象今反食之且誅疆大之臣是月羨之等戮死謝晦興江陵之甲以伐其君宋將檀道濟帥師禦之晦又奔潰伏誅

或曰是歲上伐赫連氏入其郛夏都直代西南

亦奔星

應也

二年五月太白晝見經天占曰時謂亂紀革人更王六月己丑火入羽林守六十餘日占曰禁兵大起且有反臣之戒

三年十月有流星出西南而東北行光明燭地有聲如雷鳥獸盡駭占曰所發之野有破國遷君西南直夏而

首于代都焉著而有聲盛怒也

四年五月辛酉金水合于西方占曰兵起大戰先是三年正月宋人有謝氏之難王卒盡出冬十一月上伐赫連昌入其郭徙萬餘家以歸是歲復攻之六月大敗昌于城下昌奔上邽遂拔統萬盡收夏器用虜其母弟妻子由是威加四隣北夷讐焉

神麤元年五月癸未太白犯天街占曰六夷髦頭滅二年五月太白晝見占曰大兵且興疆國有弱者是月上北征蠕蠕大破之虜獲以鉅萬計遂降高車以實漠南關地數千里云

三年六月火犯井鬼入軒轅占曰秦憂兵亂有死君又旱饑之應丙子有大流星出危南入羽林占曰兵起負海國與王師合戰是歲自三月至十月太白再犯歲星月又犯之占曰有國之君或罹兵刑之難者且歲僅十二月丙戌流星首如甕長二十餘丈大如數十斛船色正赤光燭人面自天船及河抵奎大星及于壁占曰天船以濟兵車奎爲徐方東壁衛也是爲宋師之祥昭盛者事大也是歲六月宋將到彥之等侵魏自南鄙清水入河泝流而西列屯二千餘里九月帝用崔浩策行幸統萬遂擊赫連定於平涼十二月克之悉定三秦地明

年大師涉河攻滑臺屠之宋人宵遁是時赫連定轉攻西秦戮其君乞伏慕末吐谷渾慕容瓚又襲擊定虜之以彊死者再君焉是歲二月定州大饑詔開倉賑乏或曰奎星羽獵理兵象也流星抵之而著大是爲大人之事冬十月上大閱于漠南甲騎五十萬旌旗二千餘里又明盛之徵

四年金火入東井火又犯天戶明年五月又犯鬼占曰秦有兵喪而至秦夏出夷威

沮渠蒙遜又死氏主楊難當陷宋之漢中地云

四年三月有大流星東南行光燭地長六七丈食頃乃滅後有聲占曰大兵從之是時諸將方逐宋師至歷城不及有聲駿犇之象也四月辛未太白晝見于胃胃爲

趙分五月太白犯天關十月丙辰又掩之天關外主勃
碣山河之險窮焉占曰兵革起九月丙寅有流星大如
斗赤色發太微至北斗而滅太微禮樂之庭且有昭德
之舉而述宣王命是以帝車受之是月壬申有詔徵范
陽盧玄等三十六人郡國察秀孝數百人且命以禮宣
喻申其出處之節明年六月上伐北燕舉燕十餘郡進
圍和龍徙豪傑三萬餘家以歸

四年八月金入太微亦
君自將兵象明年正月

庚午火入鬼占曰秦有死君四月己丑太白晝
見爲不臣其後秦王赫連昌叛走伏誅之應也

延和元年七月有大流星出參左肩東北入河乃滅參
主兵政晉魏墟也山河所首推之大兵將發于魏以加

燕國八月癸未太白犯心前星乙酉又犯心明堂占曰
有亡國近期二年十二月有流星大如甕尾長二十餘
丈奔君之象比歲連兵東討至太延二年三月燕後主

馮文通去國奔高麗

元年四月犯左角五月月掩斗七月月食左角皆占曰兵大起其後

征西將軍金崖安定鎮將延普涇州刺史狄子玉爭權
崔及子玉舉兵攻普不克據胡空谷反平西將軍陸俟
討獲之

三年三月丙辰金晝見在參魏邦戒也閏月戊寅金犯
五諸侯占曰四滑起官兵起亂疑己丑月入井犯太白

占曰兵起合戰秦邦受之七月上幸隰城詔諸軍討山
胡白龍入西河九月克之伏誅者數千人而宋大將軍

彭城王義康方擅威福後竟幽廢

是歲二月庚午月犯畢日而出因暈鼻及

五車占日貴人死五

月甲子陰平王求薨

太延元年五月月犯右執法九月火犯太微上將又犯左執法十月丙午月犯右執法二年二月月犯東蕃上相三月月及太白俱犯右執法及上相三年八月火犯左執法及上將五年二月木逆行犯執法皆大臣謫也

元年十月左僕射安原謀反誅三年正月征東大將軍

中山王纂太尉北平王長孫嵩鎮南大將軍丹陽王叔

孫建皆薨其後宋大將軍義康坐徙豫章誅其黨與僕

射殷景仁亦尋卒焉

元年五月慧出軒轅二年正月月犯火月后妃也三年七月木犯軒

轅至五年七月月掩填星並女主謫也真君元年太后
竇氏殂宋氏皇后亦終或曰禁出軒轅女主有爲寇者
其後沮渠氏失國
實公主潛啓魏師

二年五月壬申有星孛于房占曰名山崩有亡國八月
丁亥木入鬼守積尸十一月辛亥又犯鬼鬼秦分天戒
若曰涼君淫奢無度財力窮矣將喪國身爲戮焉

二年正月

四年十一月月皆犯
井亦爲秦有兵刑

三年正月壬午有星晡前晝見東北在井左右色黃大
如橋魏師之應也黃星出于燕墟而慕容氏滅今復見
東井涼室亡乎四年四月己酉華山崩華山西鎮也天
又若曰星孛于房既有徵矣鎮傾而國從之先是元年

十二月金犯羽林二年十二月至四年十一月火再入之五年五月太白晝見胃昴入羽林遂犯畢畢又邊兵也六月上自將西征秋八月進圍姑臧九月丙戌沮渠牧犍帥文武將吏五千餘人面縛來降明年悉定涼地

或曰星孛于房爲大臣之事又饑祥也火入鬼犯軒轅又稼穡不成自元年已來將相薨尤衆至眞君元年州

鎮十五
盡饑

四年十月壬戌大流星出文昌入紫宮聲如雷天象若日將相或以全師禦衛帝宮者其事密近有震驚之象焉明年六月帝西征詔大將軍黎敬等帥衆二萬屯漠南以備暴寇九月蠕蠕乘虛犯塞遂至七介山京師大

駭司空長孫道生等并力拒之虜乃退走是月壬午有大流星出紫微入貫索長六丈餘占曰有大君之命貫索賤人牢也明年帝命侍臣行郡國觀風俗問其所疾苦云

真君二年七月壬寅填星犯鉞鎮者國家所安危而爲之綱紀者也其嬰鉞鉞之戮而君及焉自元年十一月至此月歲星三犯房上相歲星爲人君今反覆由之循省鈞鈐之備也天若戒輔臣曰涼邦卒滅敵國殫矣而猶挾震主之威負百勝之計盍思盈亢之戒乎是時司徒崔浩方持國鈞且有寵於上明年安西李順備五刑

之誅而由浩鍛成之後八年竟族滅無後夫天哀賢良而示以明訓夙矣罕能省躬以先覺豈不悲哉浩誅之明年卒有景穆之禍後年而亂作

三年三月癸未月犯太白占曰大兵起合戰九月乙丑有星孛于天牢入文昌五車經昴畢之間至天苑百餘日與宿俱入西方天象若曰且有王者之兵彗除髦頭之域矣貴臣預有戮焉明年正月征西將軍皮豹子大敗宋師于樂鄉九月上北伐樂平王丕統十五將爲左軍中山王辰統十五將爲右軍上自將中軍蠕蠕可汗不敢戰亡追至頓根河虜二萬餘騎而還中山王辰等

八將軍坐後期皆斬

或曰慧由昴畢貴人多死十一月
太保盧魯元薨五年二月樂平王

不
薨

六年二月太白熒惑歲星聚于東井占曰三星合是爲
驚立絕行其國內外有兵與喪改立王公九月盧水胡
蓋吳據杏城反僭署百官諸虜皆響從關內大震十一
月將軍叔孫拔敗吳師于渭北至七年正月太白犯熒
惑占曰兵起有大戰時上討吳黨於河東屠之遂幸長
安三月吳軍敗績于杏城棄馬遁去復收合餘燼八月
乃夷之

五年五月月犯心六年四月又如之占曰兵犯
宋那是月太白入軒轅占曰有反臣是冬宋太

子詹事范曄謀反誅詔高涼

王那徇淮泗徙其人河北焉

九年正月火水皆入羽林占曰禁兵大起四月太白晝見經天十年五月彗星出于昴北此天所以滌除天街而禍髦頭之國也時閒歲討蠕蠕是秋九月上復自將征之所捕虜凡百餘萬矣

是歲七月太白犯哭星占曰天子有哭泣事明年春皇子

真
薨

十年十月辛巳彗星見于太微占曰兵喪並興國亂易政臣賊主至十一年正月甲子太白晝見經天四月又如之占曰中歲而再干明兵事尤大且革人更王之應也是歲十月甲辰熒惑入太微十二月辛未又犯之癸卯又如之占曰臣將戮主君將惡之仍犯事荐也先是

八年正月庚午月犯心大星九年正月犯歲星是歲九月太白又犯歲星至正平元年五月彗星見卷舌入太微卷舌讒言之戒六月辛酉彗星進逼帝座七月乙酉犯上相拂屏出端門滅于翼軫辛酉直陰國疑翼軫爲楚邦于屏者蕭牆之亂也天象若曰夫膚受之譖實爲亂階卒至芟夷主相而專其大號雖南國之君由遷及焉先是去年十月上南征絕河十二月六師涉淮登瓜步山觀兵騎士六十萬列屯三千餘里宋人兇懼饋百牢焉是年正月盡舉淮南地俘之以歸所夷滅甚衆六月帝納宗愛之言皇太子以彊死明年二月愛殺帝于

永安宮左僕射蘭延等以建議不同見殺愛立吳王余
爲主尊又賊之荐災之驗也閒歲宋太子劭坐蠱事泄

亦殺其君而僭立劭弟武陵王駿以上流之師討平之

滅於翼軫之徵也

先是七年八月月犯熒惑八月至十一月又犯軒轅是歲正月太白經天

九月火犯太微十月宗愛等伏誅高宗踐阼至十一月錄尚書元壽尚書令長孫渴侯以爭權賜死太尉黎司徒弼又忤旨左遷字于屏相之應又明年五月太后崩

高宗興安二年二月有星孛于西方占曰凡孛者非常

惡氣所生也內不有大亂外且有兵至興光元年二

月有流星大如月西行占曰奔星所墜其野有兵光盛

者事大先是京兆王杜元寶建康王崇濟南王麗濮陽

王閻文若永昌王仁相次謀反伏誅是歲宋南郡王義宣及魯爽臧質以荆豫之師構逆大將王玄謨等西討盡夷之或曰彗加太微翼軫之餘禍也春秋星之大變或災連三國之君其流炎之所及二十餘年而後弭至是彗干天庭二太子首亂三君爲戮侯王辜死者幾數十人由此言之皇天疾威之誠不可不惕也

太安元年六月辛酉有星起河鼓東流有尾跡光明燭地河鼓爲履險之兵負海之象也昭盛爲人君之事星之所往君且從之閒二歲帝幸遼西登碣石以臨滄海復所過郡國一年又尾迹之徵

是歲五月火入斗斗主形命之養其後三吳荐

饑仍歲

疾疫

二年夏四月熒惑犯太白占曰是謂相鑠不可舉事用兵成師以出而禍其雄之象也明年宋將殷孝祖侵魏南鄙詔征南將軍皮豹子擊之宋軍大敗

或曰金火合主喪事明年

十月金又犯哭星十二月
征東將軍中山王託真薨

三年十一月熒惑犯房鈞鈴星是謂疆臣不御王者憂之至四年正月月入太微犯西蕃三月又犯五諸侯占曰諸侯大臣有謀反伏誅者是月太白犯房月入南斗皆宋分占曰國有變臣爲亂十一月長星出於奎色白虵行有尾跡旣滅變爲白雲奎爲徐方又魯分也占曰

下有流血積骨明年宋兗州刺史竟陵王誕據廣陵作亂宋主親戎自夏涉秋無日不戰及城陷悉屠之

四年八月熒惑守畢直徼垣之南占曰歲饑至五年二月又入東井占曰旱兵饑疫大臣當之六月太白犯鉞占曰兵起更正朔是歲二月司空伊敝薨十二月六鎮雲中高平雍秦饑旱明年改年爲和平至六月諸將討吐谷渾什寅遂絕河窮躡之會軍大疫乃還

是歲三月流星數萬

西行占曰小流星百數四面行者庶人遷之象旣而吐谷渾舉國西遁大軍又隨躡之

四年九月月犯軒轅十二月犯氐至五年正月月掩軒轅又掩氐東南星皆后妃之府也和平元年正月丁未

歲犯鬼鬼爲死喪歲星人君也是爲君有喪事三日月

掩軒轅四月戊戌皇太后崩於壽安宮

宋志云人間宣言人主帷箔不

修故謫見軒轅又五年十一月月犯左執法明年十一月又犯之占曰大臣有憂和平二年征東將軍河東王閻毘薨十月廣平王洛侯薨

和平元年十月有長星出於天倉長丈餘僅祥也二年

三月熒惑入鬼是謂稼穡不成且曰萬人相食其後定

相阻饑宥其田租時三吳亦仍歲凶旱死者十二三先

是元年四月太白犯東井井鬼皆秦分雍州有兵亂自

元年六月月犯心大星三犯前後于房心宋分時宋君

虐其諸弟後宮多喪子女繼天哭泣之聲相再是歲詔

諸將討雍州叛氏大破之宋雍州刺史海陵王休茂亦

稱兵作亂間歲而宋主昶嗣子淫昏政刑紊焉

先是元年十月

太白入氏占曰兵起後宮有白衣會三年五月歲星犯上將占曰上將憂之三年八月月犯哭星皆宋祥也是歲樂良王萬壽及征東大將軍常山王素並薨

二年三月辛巳有長星出天津色赤長匹餘滅而復出大小百數天津帝之都船所以渡神通四方光大且衆爲人君之事天象若曰是將有千乘萬騎之舉而絕逾大川矣是月發卒五千餘通河西獵道後年八月帝校獵于河西宋主亦大閱舟師巡狩江右云

二年九月太白犯南斗斗吳分占曰君死更政大臣有

誅者十一月太白犯填填女君也且曰有內兵白衣會
至三年九月火犯積尸占曰貴人憂之斧鉞用十月太
白犯歲星歲爲人君而以兵喪干之且有死君篡殺之
禍是月熒惑守軒轅占曰女主憂之宮中兵亂十一月
歲入氐氏爲正寢歲爲有國之君占曰諸侯王有來入
宮者五年二月月入南斗魁中犯第四星占曰大人憂
太子傷宮中有自賊者又大赦旣而宋孝武及宋后相
繼崩殂少主荐誅輔臣覺連戚屬羣下相與殺之而立
宋明帝江南大饑且仍有肆眚之令焉

先是三年六月

月火入井四年五月金火皆犯上相五年六月火又入
井占曰大臣憂斧鉞用六年七月月犯心前星是月宋

殺少主其後
有乙渾之難

五年七月丁未歲星守心心爲明堂歲爲諸侯爲長子
入而守之立君之象占曰凡五星守心皆爲宮中亂賊
羣下有謀立天子者七月己酉有流星長丈餘入紫微
經北辰第三星而滅占曰有大喪九月丁酉火入軒轅
十一月長星出織女色正白彗之象也女主專制將由
此始是以天視由之長星彗之著易政之漸焉冬熒惑
入太微犯上將十二月遂守之占曰公侯謀上且有斬
臣六年正月乙未有流星長丈餘自五車抵紫宮西蕃
乃滅天象若曰羣臣或修霸刑而干蕃輔之任矣且占

曰政亂有奇令四月太白犯五諸侯占曰有專殺諸侯者五月癸卯上崩于太華殿車騎大將軍乙渾矯詔殺尚書楊寶年等于禁中戊申又害司徒平原王陸麗明年皇太后定策誅之太后臨朝自馮氏始也或曰心爲宋分是歲六月歲星晝見于南斗斗爲天祿吳分也天象若曰或以諸侯干君而代奪之是冬宋明帝以皇弟踐阼孝武諸子舉兵攻之四方響應尋皆伏誅有太白之刑與歲星之祐焉

是歲三月有流星西行不可勝數至明乃止至六月己卯又有流星

多西南行星衆而小庶人象也星之所首人將從之及宋討孝武諸子大兵首自尋陽進平開二字其後張承之師敗績于呂梁魏師盡舉淮右俘其人又西南行之效也

顯祖天安元年正月戊子太白犯歲星歲農事也肅殺
干之是爲稼穡不登六月熒惑犯鬼占曰旱饑疾疫金
革用八月丁亥太白犯房占曰霜雨失節馬牛多死九
月甲寅熒惑犯上將太白犯南斗第二星占曰貴人將
相有誅者十一月己酉太白又犯歲星或曰歲爲諸侯
太自主兵刑之政再干之事洵也是歲九月州鎮十一
旱饑十月宋氏六王皆戮死明年宋師敗于呂梁江南
阻饑牛且大疫其後東平王道符擅殺副將及雍州刺
史據長安反詔司空和其奴討滅之九月詔賜六鎮孤
貧布帛宋主以後宮服御賜征北將士後歲夏旱河決

州鎮二十七皆饑尋又天下大疫

元年六月太白犯左執法十月火又犯之

占曰大臣有憂霸者之刑用是歲六月月犯井十月又掩之皇興元年正月月犯井北轅第二星八月又蝕之占曰貴人當之有將死水旱祥也道符作亂之明年司空和其奴太宰李峻皆薨

皇興元年四月太白犯歲星占曰有攻城畧地之事六月壬寅太白犯鬼秦分也二年正月太白犯熒惑占曰大兵起是時鎮南大將軍尉元征南大將軍慕容白曜畧定淮泗明年徐州羣盜作亂元又討平之後歲正月上黨王觀西征吐谷渾又大破之

二年九月癸卯火犯太微上將占曰上將誅先是元年六月熒惑犯氐是歲十一月太白又犯之是爲內宮有

憂逼之象占曰天子失其宮四年十月誅濟南王慕容

白曜明年上迫於太后傳位太子是爲孝文帝

宋志以爲先是

比年月類犯左角占曰天子惡之及上遜位而宋明帝亦殂

高祖延興元年十月庚子月入畢口畢魏分占曰小人罔上大人易位國有拘主反臣十二月辛卯火犯鈎鈴鈎鈴以統天駟火爲內亂天象若曰人君失馭或以亂政乘之矣乙巳鎮星犯井天井者天下之平也而女君以干之是爲后竊刑柄占曰天下無主大人憂之有過賞之事焉二年正月月犯畢丙子月犯東井庚子又如之占曰天下有變令貴人多死者

三年八月月犯太微又羣陰不制之象也是時馮太后
宣淫于朝昵近小人而附益之所費以鉅萬億計天子
徒尸位而已二年九月河間王閭虎皮以貪殘賜死其
後司空東平郡王陸麗坐事廢爲兵旣而宮車晏駕或曰
月入畢口爲赦令二年正月曲赦京師及秦梁諸鎮星
及月犯井皆爲水災且旱祥也是歲九月州鎮十一水
旱詔免其田租開倉賑乏

四年九月己卯月犯畢七月丙申太白犯歲星在角丁
卯太白又入氐太白有母后之幾主兵喪之政以干君
於外朝而及其宿宮是將有劫殺之虞矣二月癸丑月
犯軒轅甲寅又犯歲星月爲彊大之臣爲主女之象始

由后妃之府而干少陽之君示人主以戒敬之備也五

年三月甲戌月掩填星天象若曰是又僻行不制而棄

其紀綱矣且占曰貴人彊死天下亂三月癸未金火皆

入羽林占曰臣欲賊主諸侯之兵盡發八月乙亥月掩

畢十一月月入軒轅食第二星至承明元年四月月食

尾五月己亥金火皆入軒轅庚子相逼同光皆后妃之

謫也天若言曰母后之釁幾貫盈矣人君忘祖考之業

慕匹夫之孝其如宗祀何是時獻文不悟至六月暴崩

實有酖毒之禍焉由是言之皇天有以覩履霜之萌而

爲之成象久矣其後文明皇太后崩孝文皇帝方修諒

陰之儀篤孺子之慕竟未能述宣春秋之義而懲供人之黨是以胡氏循之卒傾魏室豈不哀哉或曰太白犯歲於天門以臣伐君之象金火同光又兵亂之徵時宋主昏狂公侯近戚冤死相繼旣而桂陽建平王並稱兵內侮矢及宮闕僅乃戢之尋爲左右楊玉夫等所殺

或曰

月犯歲鎮金火入軒轅皆咎祥也月掩畢主邊兵四年州鎮十三饑又比歲蝗旱太和元年雲中又饑開倉賑之先是四年四月丙午有大星西流殷殷有聲十一月辛未又如之是歲五月宋桂陽王反于江州間歲沈攸之反于江陵皆爲大兵西伐時以江南內攜又詔五將伐蜀

太和元年五月庚子太白犯熒惑在張南國之次也占曰其國兵喪並興有軍大戰人主死壬申水土合于翼

皆入太微主令不行之象也占曰女主持政大夫執綱國且內亂羣臣相殺九月丁亥太白晝見經天光色尤盛更姓之祥也二年九月火犯鬼占曰主以淫泆失政相死之三年三月月犯心心爲天王又宋分三月填星逆行入太微留左掖門內占曰土守南宮必有破國易代逆行者事逆也自元年三月至二年六月月行五犯太微與劉氏篡晉同占又自元年八月至三年五月月行六犯南斗入魁中斗爲大人壽命且吳分是時馮太后專政而宋將蕭道成亦擅威福之權方圖劉氏宋司徒袁粲起兵石頭沈攸之起兵江陵將誅之不剋皆爲

所殺三年四月竟篡其君而自立是爲齊帝是年五月

又害宋君于丹陽宮

又元年十月月犯昴爲刑獄事二年六月月犯房占曰貴人有誅者

或曰月犯斗亦大臣之謫也其後李惠伏誅宜都長樂王並賜死又元年二月壬戌月在井暈參畢兩河五車占曰大赦至八月大赦天下三年正月壬子又暈參參畢畢五車東井至十月大赦天下

三年自五月至十二月月三入斗魁中四年五月庚戌

七月己巳又如之六年二月又犯斗魁第二星占曰其

國大人憂不出三年七月丁未十月丙申月再犯心大

星自四年正月至六年二月又五干之斗爲爵祿之柄

心爲布政之宮月行干而轡之亦以荐矣其占日月犯

心亂臣在側有亡君之戒人主以善事除殃是時馮太

后將危少主者數矣帝春秋方富而承事孝敬動無違禮故竟得无咎至六年三月而齊王殂焉或曰月犯斗其國兵憂心又豫州也時比歲連兵南討五年二月大

破齊師于淮陽又擊齊下蔡軍大敗之

先是三年八月金犯軒轅四年

二月又犯軒轅第二星六年正月又犯軒轅大星八月又犯軒轅左角左角后宗也是時太后淫亂而幽后之姪姊又將薄德天若言曰是無周南之風不足訓也故月太白驟干之

三年九月庚子太白犯左執法十一月丙戌月犯之四年二年辛巳月又犯之九月壬戌太白又犯之五年二月癸卯月犯太微西蕃上將至六年十月乙酉熒惑又犯之夫南宮執法所以糾淫忒成肅雍而上將朝廷之

輔也天象若曰王化將弛淫風幾興固不足以令天下
矣而廷臣莫之糾弼安用之文明太后雖獨厚幸臣而
公卿坐受榮賜者費亦巨億蓋近乎素餐焉其三年九
月安樂王長樂下獄死隴西王源賀薨四年正月廣川
王畧薨襄城王韓頽徙邊七月頓丘王李鍾葵賜死其
後任城王雲中山王叡又薨比年死黜相繼蓋天謫存
焉

四年春月又掩火亦大臣死黜之祥也又
比年月再犯昴亦爲獄事與白衣之會也

五年九月辛巳填犯辰星于軫占曰爲饑爲內亂且有
壅川溢水之變是歲京師大霖雨州鎮十二饑至六年
七月丙申又大流星起東壁光明燭地尾長二丈餘東

壁土功之政也是月發卒五萬通靈丘道十月己酉有流星入翼尾長五丈餘七星中州之羽儀翼南國也天象若日將擇文明之士使于楚邦焉明年員外散騎常侍李彪使齊始通二國之好焉

四年正月丁未月在畢暈參井五車赦祥也四

月幸廷尉獄錄囚徒明年二月大赦是月月在翼有偏日暈侵五車東井軒轅北河鬼至北斗紫垣攝提六年正月癸亥月在畢暈參兩肩五車胃昂畢畢至甲戌天下大赦江南嗣君卽位亦大赦改元

七年六月庚午辰時東北有流星一大如太白北流破爲三段十月己亥星隕如虹是時太后專朝且多外嬖雖天子由倚附之故有干明之謫焉破而爲三席勢者衆也昔春秋星隕如雨而羣陰起霸其後漢成帝時盱

日晦冥衆星行隕耀耀如雨而王氏之禍萌至是天妖復見又與元后同符矣

十年八月辰時有星落如流火三道戊寅又有流星出日西南一丈所西北流大如太白至午西破爲二段尾長五尺復分爲二入雲間仍見者事荐也後代其踵而行之以至於分崩離析乎先是七年十月有客星大如斗在參東似孛占曰大臣有執主之命者且歲旱糶貴十年九月熒惑犯歲星歲主農事火星以亂氣干之五稼旱傷之象也占曰元陽以饑人不安自八年至十一年黎人阻饑且仍歲災旱

八年正月辛巳月在畢暈井歲星黃參五車占曰有赦糶

貴其年六月大赦冬州鎮十五水旱人飢九年正月月在參暈背參兩肩五車爲大赦爲水戊申月犯井爲水祥也是歲冀定數州大水人有鬻男女者京師及州鎮十三水旱傷稼明年大赦

十一年三月丁亥火土合于南斗填爲履霜之漸斗爲經始之謀而天視由之所以爲大人之戒也占曰其國內亂不可舉事用兵是時齊主持諸侯王酷甚雖酒食之饋猶裁之有司故天若言曰非所以保根固本以貽長代之謀也內亂由是興焉五月丁酉太白經天晝見庚子遂犯畢畢又邊兵也是時蠕蠕寇邊明年齊將陳達伐我南鄙陷灃陽間歲而齊君子子響爲有司所御遂憤怒而反伏誅及齊王廋而西昌侯篡之高武子孫

所在基布皆拱手就戮亦齊君自爲之焉

十一年六月乙丑月犯斗

丙寅遂犯建星亦圖始之謀也十二年七月月犯牛十三年六月又掩之明年八月又犯之牛主吳分占日國有憂大將戮亦江南兵饑之徵也

七月癸丑太白犯軒轅大星八月甲寅又犯之皆女君之謫也天象若曰軒轅以母萬物由后妃之母兆人也

是固多穢復將安用之其物類之感又稼穡之不滋候也是歲年穀不登聽人出關就食明年州鎮十五皆大

饑詔開倉賑乏間歲太后崩

是歲月三入井金又犯之占曰陰陽不和不爲水患

且大旱其後連年亢陽而吳中比歲霖雨傷稼也

十二年三月甲申歲星逆行入氐甲申皆齊分也占曰

諸侯王而升爲天子者逆行者其事逆也先是去年十月歲辰太白合于氐是謂驚亡絕行改立王公是歲四月月犯氐與歲同舍六月丁巳月又入氐犯歲星月爲彊大之臣歲爲少君也與歲同心內宮而干犯之彊宗擅命逼奪其君之象也再干之其事荐至

十三年三月庚申月犯歲十五年六月又犯之歲星不在宿宮是爲彊侯之譴江南太子賢王相次薨歿旣而齊武帝殂太孫幼沖西昌輔政竟殺二君而篡之月再犯于氐及逆行之效也

或曰月犯木饑祥也時比歲稼穡不登又十二年正月戊戌月

犯左角十一月丙寅又如之七月金又犯左角角爲外朝且兵政也占曰不出三年天下有兵主子死大君惡

之至十四年有子響

誅間歲而齊室亂

十二年四月癸丑月火金會于井辛酉金犯火甲戌火
水又俱入井皆雨暘失節萬物不成候也且曰王業將
易諸侯貴人多死是歲月行四入氏十月辰星入之閏
月丁丑火犯氏乙卯又入之占曰大旱歲荒人且相食
國易政君失宮遠期五年氏又女君之府也是歲兩雍
及豫州旱饑明年州鎮十五大饑至十四年太后崩時
江南北連歲災雨至十七年有劫殺之禍誅死相踵焉
是歲月三犯房十三年四月又犯之七月至十月再犯
鍵閉占曰有亂臣不出三年伐其主自十二年六月至
十四年八月再犯牛又再掩之凡六犯牛且掩之牛爲
吳越饑祥也畢魏分且曰貴人多死免者十二年九月

魏書卷一百五之三
司徒淮南王佗薨十三年光州人王泰反章武汝陰南
安三王皆坐賊廢安豐王猛司空荀頽並薨十四年地
豆干及庫莫奚頻犯
塞京兆王廢爲庶人

魏書卷一百五之三

魏書卷一百五之三考證

志第三○魏收書天象志第一卷載天及日變第二卷載月變第三第四卷應載星變今此二卷天日月星變編年總繫魏及南朝禍咎蓋魏收志第三第四卷亡後人取他人所撰志補足之魏澹書世已無本据目錄作西魏帝紀而元善見司馬昌明劉裕蕭道成皆入列傳此志主東魏而晉宋齊梁君皆稱帝號亦非魏澹書明矣唐書經籍志有張太素魏書一百卷故世人疑此二卷爲太素書志崇文總目有張太素魏書天文志二卷今亦亡矣唯昭文館有史館舊本

魏書志第三卷前題朝議郎行著作郎修國史張太
素撰太素唐人故諱世民等字

太宗神瑞四年月犯歲星在角○月字下北監本脫犯
字今從南監本增入

世祖始光元年大流星出天將軍○天當作大

世祖神麿三年又明盛之徵○注秦有兵喪而至秦夏
出夷威此十一字不可讀疑有脫訛

世祖真君三年追至頓根河○頓根河本書蠕蠕傳作
頓根河

高祖太和十年占曰元陽以饑人不安○元應作亢

魏書卷一百五之三考證

魏書卷一百五之四

齊

魏

收

撰

志第四

天象一之四

太和十二年十一月戊午太白犯歲又犯火喪疾之祥
占曰國無兵憂則君有白衣之會景寅火又犯木占曰
內無亂政則主有喪戚之故十二月壬寅太白犯填占
曰金爲喪祥后妃受之十三年二月熒惑犯填占曰火
主凶亂女君應之皆文明太后之謫也先是十一年六
月甲子歲星晝見十二月甲戌又晝見是歲六月又如

之歲而麗于大明少君象也是時孝文有仁聖之表而
太后分權以干冒之及帝春秋方壯始將經緯禮俗財
成國風故比年女君之謫屢見而歲星寤盛至于不可
掩奪矣且占曰木晝見主有白衣之會是歲九月丙午
有大流星自五車北入紫宮抵天極有聲如雷占曰天
下大凶國有喪宮且空夫五車君之車府也天象若曰
是將以喪事有千乘萬騎而舉者大有聲其事昭盛至
十四年三月填星守哭泣占曰將以女君有哭泣之事
四月丙申火犯鬼喪祥也六月有大流星從紫宮出西
行天象又曰人主將以喪事而出其宮八月月太白皆

犯軒轅九月癸丑而太皇太后崩帝哭三日不絕聲勺

飲不入口者七日納管屨徒行至陵其反亦如之哀毀

骨立杖而後起雖殊俗之萌矯然知感焉自九月至于

歲終凡四謁陵又荐出紫宮之驗也

十四年十一月月犯填星十二月月

犯軒轅十五年十月月犯填又犯軒轅八月又犯之九月月掩填星十七年正月月又犯軒轅皆女君之象也

是時林貴人以故事薨及馮貴人爲后而其婦語之至二十年竟坐廢黜以憂死幽后繼立又以淫亂不終

十三年十二月戊戌填星辰星合于須女女齊吳分占

曰是爲雍沮主令不行且有陰親者至十四年三月庚

申歲星守牛占曰其君不愛親戚貴人多喪又僅祥也

是歲太白三犯熒惑十月太白入氐十一月有大流星

從南行入氏甲申齊邦之物也金火相鑠爲兵喪爲大
人之譴天象若曰宿宮有兵喪之故盛大者循而殘之
處其寢廟之中矣至十五年三月壬子歲犯填在虛三
月癸巳木火土三星合宿于虛甲午火土相犯虛齊也
占曰其國亂專政內外兵喪故立侯王九月乙丑太白
犯斗第四星戊子有大流星起少微入南宮至帝坐主
有盛大之臣乘賢以侮其君者且占曰大人易政至十
七年正月戊辰金木合于危危亦齊也是爲人君且懼
兵喪之變四月戊子太白犯五諸侯占曰有擅刑以殘
賊諸侯者至七月齊武帝殂西昌侯以從子于政竟殺

二君而自立是爲齊明帝於是高武諸子王侯數十人

相次誅夷殆無遺育矣雖繼體相循實有準命之禍故

天譴仍見云

自十五年至十七年三月行七犯建星建星爲忠臣之輔經代之謀又吳之分也十五

年再犯牽牛十六年至十七年又四犯南斗是謂臣干天祿且曰大人多死者又十五年七月金入太微十七年火入太微宮反臣之戒是歲月行四入太微十七年六入太微比歲凡十干之而齊君夷其宗室亦積忍酷也甚也

十五年四月癸亥熒惑入羽林十六年二月壬子太白

入羽林占曰天下兵起三月己卯四月丙午五月甲戌

十月辛卯月行皆入羽林十七年四月壬寅八月辛卯

十二月辛巳又如之先是陽平王頤統十二將軍騎士

七萬北討蠕蠕是歲八月上勒兵三十餘萬自將擊齊

由是比歲皆有事于南方

十五年三月月掩畢十一月又犯之十六年五月及七月

月再入畢八月十一月又再犯之十七年八月又入畢畢為邊兵占曰貴人多死十五年六月濟陰王鬱賜死

十七年南平王霄三老尉元皆死十八年安定王休死十九年司徒馮誕太師馮熙廣川王諧皆死

十七年二月庚戌火土合于室室星先王所以制宮廟

也熒惑天視填為司空聚而謀之其相宅之兆也且緯

曰人君不失善政則火土相扶卜洛之業庶幾興矣是

歲九月上罷擊齊始大議遷都冬十月詔司空穆亮將

作董邈繕洛陽宮室明年而徙都之於是更服色殊徽

號文物大備得南宮之應焉

凡五星分野熒惑統朱鳥之宿而填以軒鼓寓之皆

周鶉火之分室又井州之分是爲
步自井州而經始洛邑之祥也

十七年二月丁丑太白犯井辛丑又犯鬼五月戊午晝
見九月又如之是謂兵祥雍州也是月火木合于婁婁
爲徐州占曰其地有亂萬人不安八月辛巳熒惑入井
占曰兵革起明年二月詔征南將軍薛真度督四將出
襄陽大將軍劉昶出義陽徐州刺史元衍出鍾離平南
將軍劉薛出南鄭皆兩雍徐方之分後年正月平南王

肅大敗齊師于義陽降者萬餘己亥上絕淮登八公山

並淮而東及鍾離乃還

至十九年六月庚申金木合于
井七月火犯井三十一年十一

月大敗齊師于河北明年春復大破之下二十餘城於
是悉定沔漢諸郡時江南僞立雍州於襄陽以總牧西

土遺黎故與
東井同候

十八年四月甲寅熒惑入軒轅后妃之戒也是時左昭儀得幸方譖訴馮后上蠱而惑之故天若言曰夫膚受之微不可不察亦自我天視而降鑒焉至十九年三月月犯軒轅二十年七月辛巳又掩填星是月馮后竟廢尋以憂死而立左昭儀是爲幽后明年追廢林貞后爲庶人二十二年正月月又掩軒轅十一月又彗星起軒轅歷鬼南及天漢天又若曰是固多穢德宜其彗除矣行歷鬼又彊死之徵明年幽后賜死也十九年六月壬寅熒惑出于端門占曰邦有大獄君子惡之又更紀立

王之戒也明年皇太子恂坐不軌黜爲庶人至二十一年十月壬午熒惑歲星合于端門之內歲爲人君火主死喪之禮而陳于門庭大喪之象也二十二年二月乙丑木火合于掖門內是夕月行逮之三月丙午木火俱出掖門外再合一相犯月行逮之后妃預有咎焉明年四月宮車晏駕夫太微禮樂之庭也時帝方修禮儀正喪服以經人倫之化竟未就而崩少君嗣立其事復寢縉紳先生咸哀慟焉故天視奉而修之是以徘徊南宮蓋皇天有以著慎終歸厚之情或曰合于天庭南方有反臣之戒是時齊明帝殂比及三年而亂兵四交宮掖

既而蕭衍戡之竟覆齊室云

二十二年十一月有流星照地至天津而滅占曰將

有樓船之攻人君以大衆行二十二年而上南伐是歲之正月有流星大如三斗瓶起貫索東北流光燭地經天棊乃滅有聲如雷天棊天子先驅也占曰國中貴人有死者且大赦至三月上南征不豫詔武衛元嵩詣洛

陽賜皇

后死

世宗景明元年四月壬辰有大流星起軒轅左角東南流色黃赤破爲三段狀如連珠相隨至翼左角后宗也占曰流星起軒轅女主後宮多讒死者翼爲天庭之羽儀王室之蕃衛彭城國焉又占曰流星于翼貴人有憂繫是時彭城王忠賢且以懿親輔政借使世宗諒陰恭已而修成王之業則高祖之道庶幾興焉而阿倚母族

納高肇之譖明年彭城王竟廢後數年高氏又鳩于后
而以貴嬪代之由是小人道長讒亂之風作矣夫天之
風戒肇于履端之始而沒身不悟以傷魏道豈不哀哉
或曰軒轅主后土之養氣而庇祐下人也故左角謂之
少人焉天象若曰人將喪其所以致養幾至流亡離析
矣是歲北鎮及十七州大饑人多就食云

是歲十二月
癸未月暈太

微既而有白氣長一丈許南抵七星俄而月復暈北斗
大角爲君以兵自衛又赦祥也且爲立君之戒時蕭衍
立少主於江陵改元大赦等伐金陵以長圍逼之又二
年正月月暈井參觜昴五車占曰貴人死大赦是歲廣
陵王羽薨二月
至秋再大赦

二年正月己未金火俱在奎光芒相掩爲兵喪爲逆謀

大人憂之野有破軍殺將奎徐方也三月丁巳有流星起五諸侯入五車至天潢散絕為三光明燭地五車所以輔衰替之君也流星自五諸侯干之諸侯且霸而修

兵車之會分而為二距之

疑

之君幾將並立焉

魏收以為流星

出五車諸侯有反者至五月咸陽王禧謀反賜死

戊午填星在井犯鉞相去二

寸占曰人君有戮死者時蕭衍起兵襄陽將討東昏之亂是月推南康王寶融為帝踐阼于江陵於是齊有二君矣至八月戊午金火又合于翼楚分也十一月甲寅金水俱出西方占曰東方國大敗時蕭衍已舉夏口平尋陽遂沿流而東東主之師連戰敗績於是長圍守之

十二月齊將張稷斬東昏以降又戮主之徵至三年正月火犯房北星光芒相接癸巳填星逆行守井北轅西星皆大臣賊主更政立君之戒也三月金水合於須女女齊分金水合爲兵誅二月丁酉有流星起東井流入紫宮至北極而滅東井雍州之分衍憑之以興且西君之分使星由之以抵辰極是爲禪受之命且爲大喪是月齊諸侯相次伏誅旣而西君錫命衍受禪于建康是

爲梁武帝戊辰而少主殂

自二年至三年月六掩犯斗魁七月火犯斗皆吳分也時

江南北歲大饑又連兵北鄙負敗相迹又二年七月暈婁內青外黃轅昂畢天船大陵卷舌奎船爲徐魯又赦祥也且曰多死喪三月青齊徐兗餓死萬餘人七月大赦二年八月月暈外青內黃轅昂畢婁胃五車占曰貴

人多死十二月月犯昴環月太
傅平陽王丕薨後年正月大赦

三年八月丙戌有大流星起天中北流大如二斗器占
曰有天子之使出自中京以臨北方至四年九月壬戌
有大流星起五車東北流占曰有兵將首于東北是歲
二月辛亥三月丁未月再掩太白皆大戰之象也庚辰
揚州諸將大破梁師于陰陵十一月左僕射源懷以便
宜安撫北邊明年二月又大破梁師于邵陵九月蠕蠕
犯邊復詔源懷擊之是歲七月月暈昴畢觜參井五車
占曰旱大赦又再暈軒轅太微明
年正月月暈五車東井兩河鬼填星是
月大赦改元六月以亢陽詔撤樂減膳

正始元年正月戊辰流星如斗起相星入紫宮抵北極

而滅夫紫宮后妃之內政而由輔相干之其道悖矣且
占曰其象著大有非常之變至二年六月癸丑有流星
如五斗器起織女抵室而滅占曰王后憂之有女子白
衣之會往反營室釁歸後庭焉三年正月己亥有大流
星起天市垣西貫紫蕃入北極市垣之西又公卿外朝
之理也占曰以臣犯主天下大凶明年高肇欲其家擅
寵乃鳩殺于后及皇子昌而立高嬪爲后

先是景明四年七月太白

犯軒轅大星至二年六月木犯
昴占曰人君有白衣之會同上

三年六月丙辰太白晝見占曰陰國之兵彊八月梁師
寇邊攻陷城邑秋九月安東將軍邢巒大破之宿豫斬

將三十餘人捕虜數萬十月甲寅月犯太白又大戰之

象明年中山王英敗績于淮南士卒死者十八九

又元年正

月月暈胃昴畢五車戊午又暈五車東井兩河鬼填星
二月甲申又暈昴畢觜參三年正月月暈太微軒轅皆

爲兵赦是月皇子
生大赦天下

四年七月己卯有星孛于東北占曰是謂天譏大臣貴
人有戮死者凡孛出東方必以晨乘日而見亂氣蔽君
明之象也昔魯哀公十三年十一月有星孛于東方明
年春秋之事終是謂諸夏微弱蠻夷遞霸田氏專齊三
族擅晉卒以干其君明而代奪之陵夷遂爲戰國天下
橫流矣今孛星又見與春秋之象同天戒若曰是居太

陽之側而干其明者固多穢德可彗除矣而君不悟衰替之萌將繇此始乎是歲高肇鳩后及皇子明年又譖殺諸王天下寃之肇故東夷之俘而驟更先帝之法累構不測之禍干明孰甚焉魏氏之悖亂自此始也

永平元年三月戊申熒惑在東壁月行抵之相距七寸光芒相及室壁四輔君之內宮人主所以庇衛其身也天象若曰且有重大之臣屏藩王室者將以讒賊之亂死於內宮又曰諸侯相謀三月癸未填星逆行太微在左執法西是爲后黨持政大夫執綱而逆行侮法以啓蕭牆之內是月月犯畢六月又掩之占曰貴人有死者

庚辰太白歲星合于柳柳爲周分且占曰有內兵以賊諸侯八月京兆王愉出爲冀州刺史恐不見容遂舉兵反以誅尚書令高肇爲名與安樂王詮相攻于定州九

月太師彭城王勳于禁中愉亦死之

或曰柳豫州分所合之野謀兵有戰

野拔邑事至十一月丙子流星起羽林南大如椀色赤有黑雲東南引如一匹布橫北轢星占曰禁兵起所首召之是歲豫州人白早生殺刺史司馬悅以城降梁遣尚書邢巒擊之十二月巒拔懸瓠斬早生

二年三月丁未有流星徑數寸起自天紀孛于市垣光芒燭地有尾跡長丈餘凝著天天象若曰政失其紀而亂加乎人浸以萌矣是將以地震爲徵地震者下土不安之應也是月火入鬼距積尸五寸積尸人之精爽而

炎氣加之疫祥也四月乙丑金入鬼去積尸一寸又以
兵氣干之彊死之祥也踰逼者事甚鬼主驕亢之戒故
金火荐災其人以警而懼之五月太白犯歲光芒相觸
占曰兵大亂歲饑不出三年七月庚辰有流星起騰虵
入紫宮抵北極而滅天戒若曰彼光後王道者疑以馭

陰陽之變矣將有水旱之沴地震之祥而後災加皇極

焉明年夏四月平陽郡大疫死者幾三千人平陽鬼星
之分也秋州郡二十大水冀定旱饑四年胸山之役喪
師殆盡其後繁時桑乾靈丘秀容鴈門地震陷裂山崩
泉涌殺八千餘人延昌三年詔曰比歲山鳴地震于今

不已朕甚懼焉至正月宮車晏駕

七年十一月丙戌月掩畢火星至三年八

月火犯積尸占曰貴人死又饑疫祥也比年水旱災疫是月中山王略薨明年春司徒廣陽王嘉薨

二年九月甲申歲星入太微距右執法五寸光明相及

十二月乙酉逆行入太微掩左執法三年閏月壬申又

順行犯之相去一寸保乾圖曰臣擅命歲星犯執法是

時高肇方爲尚書令故歲星反復由之所以示人主也

天若言曰政刑之命亂矣彼居重華之位者盍將反復

而觀省焉今雖厚而席之適所以爲禍資耳且占曰中

坐成刑遠期五年間五歲而肇誅

四年四月庚午熒惑犯軒轅大星至五月

入太微距右執法三寸光芒相接熒惑天視也始由軒轅而省執法之位其象若曰是居后黨而擅南宮之命

君其降監焉其
應與歲星同也

四年正月戊戌有流星起張西南行殷殷有聲入參而
滅張河南之分參爲兵事占曰流星自東方來至代而
止有來兵大敗吾軍有聲者怒也先是去年十一月月
犯太白是歲又犯之在胃八月辛酉又犯之胃爲徐方
大戰之象也十月戊寅有大流星孛于羽林南流色赤
珠落下入濁氣孛然而流王師潰亂之兆先是梁胸山
鎮殺其將來降詔徐州刺史盧昶援之十二月昶軍大
敗於淮南淪覆十有餘萬

是歲七月乙巳有流星起北
斗魁前西北流入紫宮至北

極而滅占曰不出期年兵起且亡君
戒是歲有胸山之役間歲而帝崩

四年十二月己巳歲星犯房上相相距一寸光芒相及至延昌元年三月丙申歲星在鈞餘東五寸距鍵閉三寸丙午又掩房上相天象若曰夫鈐鍵之轡君上所宜獨操非驂服所當共也先是高肇爲尚書令而歲星三省執法是歲至升爲司徒猶快快不悅而歲星又再循之所以示人主審矣閒二歲而上崩肇亦誅滅

或曰木與房合

主喪水又元年二月月暈井鬼軒轅十月又暈井五車參畢皆水旱饑救之祥自元年二月不雨至六月雨大水二年四月庚子出絹十五萬匹賑河南飢人是夏州郡十二大水八月滅天下殊死

二年四月庚午熒惑犯軒轅大星十月壬申月失行犯軒轅大星至延昌元年三月填星在氐守之九十餘日

占曰有德令拜太子女主不居宮至十月立皇太子賜
爲父後者爵旌孝友之家至二年三月乙丑填星守房
占曰女主有黜者以地震爲徵地震者陰盈而失其性
也四月丙申月掩填星七月戊午又如之是爲后妃有
相遷奪者且曰女主死之時比歲地震至三年八月太
白又犯軒轅十二月月掩熒惑皆小君之譴也時高后
席寵凶悍雖人主猶畏之莫敢動搖故世宗侑嗣幾絕
明年上崩后廢爲尼降居瑤光寺尋爲胡氏所害以厭
天變也

延昌元年八月己未有流星起五車西南流入畢畢邊

兵也占曰有兵車之事以所直名之至二年十一月戊
午又有流星起五車西南流殷殷有聲憑怒者事盛也
十二月己卯有流星西南流分而爲二又偏師之象也
至三年六月辛巳太白晝見占曰西兵大起有王者之
喪十一月大將軍高攀伐蜀益州刺史傅豎眼出北巴
平南羊祉出涪安西奚康生出綿竹撫軍甄琛出劍閣
會帝崩旋師先是元年三月己酉木土相犯占曰人君
有失地者將死之又曰先作事者敗兵起
必受其殃三年九月太白掩右執法是爲大將軍有羅
刑辟者先是二年二月梁郁洲人徐立明斬大將張稷
來降及擊出
征還亦就戮

元年二月乙未有流星起太陽守歷北斗入紫宮抵北

極至華蓋而滅太陽守所以弼承帝車大臣之象今使
星由之以語天極之位臣執國命將由此始乎且占曰
天下大凶主室其空先是去年八月至十月月再入太
微是歲三月又如之十二月甲戌月犯火于太微占曰
君死不出三年貴人奪權失勢二年三月辛酉熒惑又
犯太微占曰天下不安有立君之戒九月丁卯入太微
犯屏星明年正月而世宗崩於是王室遂卑政在公輔
三年二月月暈畢昴五車太白東井占主赦是月太白
失行在天關北占有關梁之兵道不通明年正月肅宗
立大赦天下二月采將
任大洪帥衆寇關城

四年五月庚戌九月乙丑十月癸巳月皆犯太微中歲

而驟干之疆臣不御執法多門之象也閏月戊午月犯
軒轅又女主之謫十一月庚寅木火會于室相距一尺
至甲午火徙居東北亦相距一尺室爲後宮火與木合
曰內亂環而營之或淫事干逼諸侯之象占曰姦臣謀
大將戮若有夷族之害以赦令除之先是三年九月太
白犯執法是歲八月領軍于忠擅戮僕射郭祚九月太
后臨朝淫放日甚至逼幸清河王懌其後羽林千餘人
焚征西將軍張彝宅辜死者百數朝廷不能討於是大
赦原羽林亦營室之故也

魏收以爲月犯太微大臣有死者其後安定王薨月犯軒

轅女主憂之其後皇太后高尼崩于瑤光寺營室又主土功也胡太后害高氏以厭天變乃以后禮葬之

四年十月太白犯南斗斗爲吳分占曰大兵起先是三
年四月有流星起天津東南流轢虛危天津主水事且
曰有大衆之行其後梁造浮山堰以害淮泗諸將攻之
是歲閏月有大彗星起七星南流色正赤光明燭地尾
長丈餘歷南河至東井七星河南之分也流星出之有
兵起施及東井將以水禍終之又占曰所與城等疑是
時鎮南崔亮攻梁師于碶石明年二月鎮東蕭寶夤大
破梁淮北軍九月淮堰決梁人十餘萬口皆漂入海

肅宗熙平元年三月丙子太白犯歲星十二月甲辰月
犯歲星是謂彊盛之陰而陵少陽之君歲又諸侯也天

象若曰始由內亂干之終以威刑及之是歲正月熒惑犯房四月庚子又逆行犯之癸卯月又犯房占曰天下有喪諸侯起霸將相戮十一月大流星起織女東南流長且三丈光明照地占曰王后憂之有女子白衣之會間歲高太后殂司徒國珍薨中宮再有喪事其後僕射于忠司徒任城王澄薨既而太后幽逼清河中山王戮死或曰月太白犯歲星僅祥也火犯房陳兵滿野有饑國且大赦又元年十二月月暈井甯參五車占曰水旱有赦至二年正月大赦十月幽冀滄瀛大饑是月月再暈畢參五車占曰饑赦明年幽州大饑死者數千人自正月不雨至六月是歲四夷反叛兵大出又赦改元

二年六月癸丑有大流星出河鼓東南流至牛十一月

流星起河鼓色黃赤西南流長且三丈有光照地至神龜元年四月壬子有流星起河鼓西北流至北斗散滅河鼓鼓旗之應也故流星出之兵出入之兵入昔宋泰始初大流星出自河鼓西南行竟夜有小星百數從之既而諸侯同時作亂至是三出河鼓秦州屬國羌及南秦東益氐皆反七月河州人却鐵忽與羣盜又起自稱水池王詔行臺源子恭及諸將四出征之朝廷多事故天應屢見云

神龜二年四月甲戌大流星起天市垣西東南流轆尾光明燭地天象若曰將作大眾而從后妃之事矣以所

首名之是歲九月太后幸崧高或曰市垣所以均國風

尾幽州也明年詔尚書長孫稚撫巡北蕃觀省風俗

二月

丙辰月在參暈井觜參歲星五車占曰
有死相且赦明年諸王多伏辜又大赦

二年八月己亥太白犯軒轅是月月又犯之至正光元
年正月月又犯軒轅大星四月庚戌金火合于井相去
一尺占曰王業易君失政大臣首亂將相戮死以用師
大敗五月丙午太白犯月相距三寸占曰將相相攻秦
國有戰七月太白犯角角天門也是爲兵及朝廷占曰
有謀不成破軍斬將是月侍中元叉矯詔幽太后于北
宮殺太傅清河王懌八月中山王熙起兵誅元叉不克

遇害明春衛將軍奚康生謀討义于禁中事泄又死是冬諸將伐氐官軍敗績

正光元年九月辛巳有彗星光爛如火出于東方陰動爭明之異也感精符曰天下以兵相威以勢相乘至威

疑亂起布衣從衡禍未庸息帝宮其空昔正始中天譏

字于東北是歲而攝提復周故天象若曰夫讒之亂萌有自來矣彗除之象今則著矣戰國之禍將由此作乎

間三年而北鎮肇亂關中迹之自是姦雄鼎沸覆軍相

踵其災之所及且二十餘年而猶未弭焉

梁志曰九月乙亥有星晨

見東方光如火占曰國皇見有內難急兵明年義州反乙亥去辛巳凡六日而北方覲之其氣蓋同矣始干其

明以妖南國既又禁
而布之以除魏邪

二年四月甲辰火土相犯於危十一月辛亥金土又相
犯于危危存亡之機太白司兵熒惑司亂而玄枵司人
土下之所係命也三精游聚羣臣叶謀以濟屯復之運
焉占曰天下方亂甲兵大起王后專制有虛國徙王至
四年四月己未火土又相犯于室是謂後宮內亂且占
曰欲殺主天子不以壽終或曰魏氏軒轅之裔填星之
物也赤靈爲母白靈爲子經綸建國之命所以傳撥亂
之君也其受之者將在并州與有齊之國乎其後太后
淫昏天下大壞上春秋方壯誅諸佞臣由是鄭儼等竦

懼遂說太后鳩帝既而爾朱氏興于并州終啓齊室之

運卜洛之業遂丘墟矣

二年十月月掩心大星至三年正月月掩心距星四月丁丑又

如之占曰亂臣在側闕四字五年間三歲而肅宗崩

三年七月庚申有大流星如五斗器起王良東北流長一丈許王良主車騎且曰有軍涉河昭盛者事大是日

月在昴北三寸十一月乙卯又如之是謂兵加匈奴且

胡王之讎也先是蠕蠕阿那瓌失國詔北鎮師納之是

歲八月蠕蠕後主來奔懷朔鎮聞歲阿那瓌背約犯塞

詔尚書令李崇率騎十萬討之出塞三千餘里不及而

還

二年九月庚戌月暈胃昴畢五車辛亥又暈之占曰闕二字有赦至三年九月月在畢暈昴畢觜參五車是

歲夏大旱十
二月大赦

三年二月丁卯月掩太白京師不見涼州以聞占曰天
下大兵起涼州獨見災在秦也三月癸卯有大流星起
西北角流入紫宮破爲三段光明照地角星主外朝兵
政流星由之將大出師之象若曰將以兵革之故王室
分崩入抵紫宮天下大凶有虛國之象四月癸酉有大
奔星歷紫微入北斗東北首光明燭地殷然如雷盛怒
之象也皆以所直名之至四年八月乙亥月在畢掩熒
惑又邊城兵亂之戒也十月乙卯太白入斗口距第四
星三寸光芒相掩占曰大兵起將戮辱又吳分也五年

正月沃野鎮人破落汗拔陵反臨淮王彧征之敗績于

五原六月莫折大提反於秦雍州刺史元志討之又大

敗於隴東明年南方諸將頻破梁師至八月杜落周起

上谷其後鮮于修禮反定州王師比歲北征冀方大震

既而葛榮承之竟陷河北

五年二月月在參暈觜參五
車東井熒惑八月又暈之閏

月月在張翼冉暈軒轅太微占曰兵起士卒多遁走一

日士卒大聚又告赦祥也是時徵調驟起兵相蹈籍又

有詔內外戒嚴將親征自二月至六月再大赦

天下十月月在畢暈昴畢觜參後年春又大赦

先是二年九月歲星犯左執法至三年正月癸丑又逆行犯之相去四寸光芒相及五月丙辰歲星又掩左執法是時宦者劉騰與元义叶謀遂總百揆之任故歲星

反復由之與高肇同占至四年二月騰死又由是失援
其年十一月庚戌歲星犯房上相相距二寸光芒相掩
五年四月己丑歲星又逆行犯之明年皇太后反政又
遂廢黜昔高肇爲尚書令而歲星三省之及升于上相
歲星亦再循之至是三犯執法而騰死再干上相而又
敗曠官之譴異代同符矣

孝昌元年五月太白犯軒轅八月在張角盛大占曰有
暴酷之兵張河南也十二月火入鬼又犯之占曰大賊
在大人之側后以淫泆失政又秦分也二年正月癸卯
金木相犯於牛十一月戊申又相犯于女歲所以建國

均人女爲蠶妾牛爲農夫天象若曰是將罹以寇戎而喪其耕織之務矣且曰有亂兵大戰而波及齊吳是歲八月甲申月在胃掩鎮星閏月癸酉又掩之三年正月戊辰又掩之是爲女君有罹兵刑之禍者洵干之事甚而衆也又占曰天下大喪无主貴人兵死國以滅亡又二年三月奔星大如斗出紫微東北流光照地占曰王師大出邦去其君六月有奔星如斗起大角入紫宮而滅棟星以肆觀羣后而敷威令于四方也今大號由之以詔天極不以逆乎且有空國徙王之戒焉十月有星入月中而滅占曰入而無光其國卒滅星反出者亡國

復立是歲四月至三年九月熒惑再犯軒轅大星武泰
元年正月又逆行復犯之占曰主命將失女君之象亂
逆之災三月庚申月掩畢大星占曰邊兵起貴人多死
者是時淫風滋甚王政盡弛自大河而北極關而西覆
軍屠邑不可勝計旣而蕭寶夤叛于雍州梁師驟伐淮
泗連兵青土萬姓嗷嗷喪其樂生之志矣是歲二月帝
竟以暴崩四月爾朱榮以大兵濟河執太后及幼主沉
諸中流害王公以下二千遂專權晉陽以令天下焉

三年

正月癸酉月在井暈紫參兩河五
車七月大赦明年少主立又大赦

莊帝永安元年七月癸亥太白犯左角相距四寸光芒

相掩兵及朝廷之象占曰大戰不勝貴人有來者其謀不成至二年閏月熒惑入鬼犯積尸占曰兵起西北有鉄鉞之誅是歲北海王顥以梁師陷考城執濟陽王暉業乘虛逐勝遂入洛陽至七月王師大敗之顥竟戮死有謀不成之驗明年爾朱天光擊反虜萬俟醜奴及蕭寶夤于安定克之咸伏誅

二年十一月熒惑自鬼入太微西掖門犯上將出東掖門犯上相東行累日句已去來復逆行而西十二月乙丑月又掩之至三年正月癸未逆行入東掖門己丑月入太微襲熒惑辛卯月行太微中又暈之三月己卯在

右執法北一尺五寸留十四日至壬辰月又掩之復順
行而東四月戊午月又干太微而暈己未熒惑出端門
在左執法南尺餘而東自魏興以來未有循環反復若
此之荐也是時孝莊將誅權臣有興復魏室之志是以
誠發於中而熒惑咨謀於上焉其占曰有權臣之戮有
大兵之亂貴人以彊死而天下滅亡至五月己亥太白
在參晝見參爲晉陽之墟天意若曰干明之釁於是乎
在矣七月甲午有彗星晨見東北方在中台東一丈長
六尺色正白東北行西南指丁酉距下台上星西北一
尺而晨伏庚子夕見西北方長尺東南指漸移入氐至

八月己未漸見癸亥滅占曰彗出太階有陰謀姦宄興
凡天事爲之徵形以戒告人主始滌公輔之穢而彗除
之權臣將滅之象再干太陽之明而後陵奪之逆亂復
興之象也三月而見者變近亟也究于內宮者反仇其
上也近期在衝遠期一年先是二月壬申有大流星相
隨西北尾迹不絕以千計西北直晉陽之墟而微星庶
人所以載皇極也人從而君從之是月戊戌有大奔星
自極東貫紫宮而出影迹隨之遷君之應至九月上誅
太原王榮上黨王天穆于明光殿是夕爾朱氏黨攻西
陽門不克退屯河陰十二月洛陽失守帝崩于晉陽自

是南宮板蕩劫殺之禍相踵先是永安元年七月丙子十一月丙寅十二月癸巳月皆掩畢大星至二年三月乙卯月入畢口八月乙丑又距畢左股二寸光芒相掩須臾入畢口十二月丙辰掩畢右股大星三年六月乙巳又犯畢大星八月庚申入畢口犯左股大星是月辛丑太白犯軒轅明年五月月又犯畢右股遂入之畢星所以建魏國之命也占曰天下有變其君大憂邊兵起上將戮月游干之事甚而衆及爾朱兆作亂奉長廣王爲主號年建明明年二月又廢之而立節閔六月高歡又推安定王爲帝於信都復黜之後更立武帝於是三

少王相次崩殂又洛陽再陷六宮汗辱有兵及軒轅之

效焉

永安二年十月辛亥十二月丁巳月皆在畢暈昴畢填星觜參五車普泰元年正月己丑月在角暈

軫角五車亢連環暈北斗大角織女十月又暈昴畢觜參井五車是時肆赦之令歲月相踵

節閔普泰元年五月辛未太白出西方與月並間容一指戰祥也先是去年十一月辛丑月在太白北不容一

指占曰有破軍殺將主人不勝旣而爾朱氏南侵王師

敗績至是又與月合幾將復之乎十月甲寅金火歲土

聚于觜參甚明大晉魏之墟也且曰兵喪並起霸君興

焉是時渤海王歡起兵信都改元中興至十一月己卯

奔星如斗起太微東北流光明燭地有聲如雷占曰大

臣有外事以所首事命之或曰中國失君有立王遷主著而有聲者盛怒也是時爾朱氏成師北伐明年三月癸巳火逆行犯氐占曰天子失其宮閏月庚申歲星入鬼犯天尸占曰有戮死之君既而爾朱兆等大敗于韓陵覆師十餘萬四月武帝卽位比及歲終凡殺三廢帝孝武永熙元年九月太白經天十一月辛丑有大流星出昴北東南流轢畢貫參光明照地有聲如雷天象若曰將有髦頭之兵憑陵塞垣與大司馬合戰明年正月丁酉渤海王歡追擊兆等于赤洪嶺大破之爾朱氏殲焉

二年四月太白晝見九月丁酉火木合于翼相去一寸
光芒相掩占曰是謂內亂姦臣謀人主憂甲寅金火合
于軫相去七寸光芒相及占曰是謂相鑠不可舉事用
兵翼軫南宮之蕃又荊州也至三年三月癸巳有奔星
如三斛囊起匏瓜西流入市垣有光燭地迸流如珠尾
跡數丈廣且三尺凝著天狀如蒼白雲須臾屈曲蛇行
匏瓜爲陰謀星大如囊爲發謀舉事光盛且大人貴而
衆也以所首名之且爲天飾王者更均封疆是時斛斯
椿等方說上伐高歡荊州刺史賀拔岳預謀焉高歡知
之亦以晉陽之甲來赴七月上自將十餘萬次河橋望

歡軍憚之不敢戰遂西幸長安至十月渤海王更奉孝

靜爲主改元天平由是分爲二國更均封疆之應也是

月歡命侯景攻荊州拔之勝南奔

是年三月庚子木逆行在左執法北一寸

光芒相掩五月甲申又在執法西半寸乍見乍不見占曰強臣擅命改政更元十二月上崩由是高歡宇文泰擅權兩國又二年十一月乙丑三年八月庚午十二月庚申月皆在畢暈畢昴參五車自三年二月至明年正月東西魏凡四大赦

三年五月己亥熒惑逆行掩南斗魁第二星遂入斗口

先是元年十一月熒惑入斗十餘日出而逆行復入之

六十日乃去斗大人之事也占曰中國大亂道路不通

天下皆更元易政吳越之君絕嗣是歲東西帝割據山

河遂爲戰國比十月至正月梁魏三帝皆大赦改元或曰斗爲壽命之養而火以亂氣干之耄荒之戒也是時梁武帝年已七十矣怠於聽政專以講學爲業故皇天殷勤著戒又若言曰經遠之謀替矣將以逆亂終之而勦其天祿焉夫天懸而示之且猶不悟其後攝提復周

卒有侯景之亂云

三年十二月梁人立元慶和爲魏王屯平瀨明年正月東南行臺元晏大

破之六月豫州刺史堯雄又大破梁師於南頓十月梁攻單父徐州刺史任祥又大破之斬虜萬餘級十一月柳仲禮寇荊州諸將又大敗之時梁軍政益弛故累有負敗之應

東魏孝靜天平二年有星孛于太微歷下台及室壁而滅南宮成周之墟孝文之餘烈也孛星由之易政徙王

之戒天象若曰王城爲墟夏聲幾變而台階持政有代奪之漸乎且抵于營室更都之象也是後兩霸專權皆以北俗從事河南新邑遂爲戰爭之郊間三歲至興和元年九月發司州卒十萬營鄴都十月新宮成天平元年閏月月掩心大星二年八月又犯之相去七寸十一月又掩心小星相臣逼主之象且占曰人臣伐主應以善事除殃時兩雄王業已定特以人臣取容而已至興和二年八月月又犯心大星後數年而禪代

元象二年七月壬戌金土合于七星癸亥遂犯七星七星河南之分金而犯土將有封畿之戰且占曰其分亡地先是去年十二月癸丑太白食月是歲三月壬申太白又與月合相距一寸大戰之祥也月象彊大之國而

金合之秦師將勝焉十二月有流星從天市垣西流長
且一丈有尾迹三年正月渤海王歡攻夏州克之十月
丁丑月犯火占曰大將有鬪死者十二月大都督竇泰
入潼關明年宇文泰距擊斬之十月遂及渤海王歡戰
于沙苑歡軍敗績捕虜萬餘是月獨孤信拔洛陽

三年十一月熒惑犯歲星占曰有內亂臣謀王至四年
正月客星出于紫宮占曰國有大變二月壬申八月癸
未月再掩五車東南星占曰兵起道不通十一月太白
晝見占曰軍興爲不臣五年二月庚戌三月甲子填星
逆順行再犯上相上相司徒也六月太白入東井占曰

秦有兵大臣當之至元象元年七月太白在柳晝見柳
河南也八月辛卯有大流星出房心北東南行長且三
尺尾迹分爲三段軍破爲三之象也先是行臺侯景司
徒高昴圍金墉西帝及宇文泰自將救之是月陳于河
陰泰以中軍合戰大克司徒高昴死之旣而左右軍不
利西師由是敗績斬將二十餘人降卒六萬是月西帝

大傅梁景叡據長安反關中大震尋皆伏誅

天平三年正月元象

元年三月月再掩軒轅大星是年西帝廢皇后乙氏立
蠕蠕女爲后明年五月火犯軒轅大星旣而乙氏遇害
其後蠕蠕后又死而乙氏爲崇焉元象元年十月月犯
昴暈畢胃丁未在翼暈大星軒轅左角十一月在井暈
五車兩年東西
主凡三大赦

興和元年二月壬子火犯井占曰秦有兵亂貴人當之
四月又入鬼亦兵喪之祥也又土地之分也至二年十
一月甲戌太白在氐與填星相犯氐鄭地也至四年七
月壬午火木合于井相去一尺占同天平明年北豫州
刺史高仲密據武牢西叛宇文泰帥衆援之戊申及渤
海王戰于邙山西軍大敗虜王侯將校四百餘人獲六

萬餘級

元年八月月在畢暈昴畢觜五車二年正月大
赦三年正月至八月又再暈之歲星在焉四年

十一月月暈軒轅太微壬申又暈胃昴畢五車皆兵饑
救祥也明年東西王皆大赦後年三月高歡入朝以春
冬亢旱請賑窮乏
死罪已下皆宥之先是元年十月辛丑有彗星出于南

斗長丈餘至十一月丙戌距太白三尺長丈餘東南指

二月乙卯至婁始滅占曰彗出南斗之土皆誅其上疑
又吳分始自微末終成著大而與兵星合焉天戒若曰
夫劫殺之萌其事由來漸矣而人君辨之不早終以兵
亂橫流不可撲滅焉婁又徐方之次亂之所自招也至
二年四月己丑金木相犯于奎丙午火木又相犯于奎
奎爲徐方所以虞蹶防之寇也歲主建國之令而省人
君之差敗火主亂金主兵三精游而聚謀所以哀矜下
土而示驅除之戒也是時梁主衰老太子賢明而不能
授之以政焉由是領軍朱异等浸侵明福之權至武定
五年侯景竊河南六州而叛又與連衡而附益之是歲

十二月梁師敗績于彭城捕虜五萬餘級江淮之間始蕭然愁歎矣明年師大敗陷溺以十萬數景遂舉而濟江三吳大荒道殣流離者大半淮表二十六州咸內屬焉昔三精聚謀於危九年而高氏霸至是聚謀於奎而蕭氏亡亦天之大數云爾

武定二年四月丁巳熒惑犯南宮上將戊寅又犯右執法占曰中坐成刑金火尤甚四年四月庚午金晝見六月癸巳月入畢九月壬寅太白在左執法東南三寸許是爲執法事五年正月月犯畢大星貴人之謫也先是九月大丞相歡圍玉壁不克是月歡薨于晉陽辛亥侯

景反僕射慕容紹宗擊之八月淮南三王謀反誅明年

紹宗攻王思政于潁川竟溺

四年九月月在翼暈軒轅太微帝坐五年二月暈昴

畢參井五車五月在張又暈軒轅太微時兵革屢動東西帝皆比歲大赦

七年九月戊午月掩歲星在斗斗爲天廟帝王壽命之期月由之以干歲星是爲大人有篡殺死亡之禍是歲梁武帝以憂逼殂明年而齊帝後年西主文帝及梁簡文又終天下皆有大故而江表尤甚八年三月甲午歲鎮太白在虛虛齊分是爲驚立絕行改立王公熒惑又從而入之四星聚焉五月丙寅帝禪位于齊是歲西主大統十六年也是時兩主立而東帝得全魏之墟爲天

官爲正昔宋武北伐西星聚奎及西伐秦四星聚井四星聚參而渤海始霸四星聚危而文宣受終由是言之帝王之業其有徵矣其後六年西帝禪于周室天文史失其傳也

魏書卷一百五之四

魏書卷一百五之四考證

志第四○此卷亦闕後人所補

高祖太和十二年景寅○唐人諱丙故南北史俱作景
此亦作景者志爲唐人所著故也若卷內或有仍作
丙者則又後人間有改易耳

高祖太和十五年注十五年三月月掩畢○三月下北
監本脫月字今從南監本增入

又注司徒馮誕○馮監本誤作馬今改正

肅宗正光二年注間三歲○三監本訛作五今以上文
推之則以三爲是

魏書卷一百五之四考證